

庫文有萬

種千一集一第


編主五雲王



目綱草本

(七十二)

訂重棠紹張



行發館書印務商



目 網 草 本

(七十二)

訂重棠紹張

香 叢 本 基 學 國

萬有文庫

第一集一千種

總編纂者

王雲五

商務印書館發行

本草綱目

拾遺卷三

草部上

參條

從新云。遼參之橫生蘆頭上者。其力甚薄。止可用以調理常病。生津止渴。其性橫行手臂。凡指臂無力者。服之甚效。○千金方云。凡煮參湯。須用流水煎之佳。若用止水則不驗。

參鬚

百草鏡。參鬚寧古塔來者。色黃粗壯。船廠貨次之。鳳凰城貨色帶白爲劣。煎之亦無厚味。從新云。參鬚亦遼參之橫生蘆頭上而甚細者。性與參條相同。而力尤薄。本經逢原云。參鬚價廉。貧乏者往往用之。其治胃虛嘔逆。欬嗽失血等症。亦能獲效。以其性專下行也。若治久痢滑精。崩中下血等症。每至增劇。以其味苦降泄也。

腳瘡溼爛。百草鏡云。芽茶參鬚各等分。爲末。摻之。

固牙補腎方。祝氏效方。生熟石膏各五錢。甘松山柰各三錢。細辛二錢。寒水石二錢。升麻一錢五分。

青鹽參鬚各三錢。北五味五十粒。畢澄茄四十五粒。共爲末。每晨擦牙漱口。嚥下亦可。

參葉

遼參之葉也。率多參客帶來。以其氣味清香而微甘。善於生津。又不耗氣。故販參者乾之。帶以餉遺。茶葉入湯用。不計入藥用也。人亦無用之者。近因遼參日貴。醫輒以之代參。凡症需參而無力用者。輒市葉以代。故今大行於時。蘇州參行市參葉。且價至三五換不等。以色不黃瘁。綠翠如生。手掇之有清甜香氣者真。

氣清香。味苦微甘。其性補中帶表。大能生胃津。祛暑氣。降虛火。利四肢頭目。浸汁沐髮。能令光黑而不落。醉後食之。解醒第一。

按人參三椬五葉。乃稟三才五行之精氣。寄形於草質。爲百草之王。其根乾之色黃。得坤土正色。其子秋時紅如血。是土之餘生火也。故能峻補元氣。返人魂魄。其功尤能健脾。蓋脾主中宮。爲萬物之母。人無土不生。參得土德之精以生人。非若芪朮之膩滯。世所以重之。然百草本性。大率補者多在根。葉則枝節之餘氣。不可以言補也。參葉雖稟參之餘氣。究其力止能行皮毛四肢。性帶表散。與參力遠甚。惟可施於生津潤燥益肺和肝之用。今一概用作培補元氣。起廢救危。何不察之甚耶。

清肺生津。止渴。藥性考

人參子

人參子如腰子式。生青熟紅。近日販參客從遼東帶來者。皆青綠色。如小黃豆大。參葉上甚多。寧古塔一帶。七八月霜大。難以入山。故不能待其子熟。生取而歸。以售客。每多綠色。發痘行漿。凡痘不能起發。分標行漿者。藥內加參子。後日無癢塌之患。

珠參

金沙江志。產東川者。味似參。較苦。○本草從新云。出閩中。以大而明透者佳。須多去皮。滾水泡過。然後可用。因其苦劣之味。皆在外邊。近中心則苦減而稍甘。○書影叢說。雲南姚安府亦產人參。其形扁而圓。謂之珠兒參。○藥性考。珠兒參根與薺苳同。

苦寒微甘。味厚體重。○救生苦海云。補肺降火下氣。肺熱有火者宜之。臟寒者服之。即作腹痛。鬱火服之。火不透發。反生寒熱。血症用之。可代三七。○藥性考。味辛甘。性溫。能托裏。外症堪用。

按珠參本非參類。前未聞有此。近年始行。然南中用之絕少。或云來自粵西。是三七子。又云草根。大約以參名。其性必補。醫每患其苦寒。友人朱秋亭客山左。聞貨珠參者有製法。服之可代遼參。每五錢索價五十金。秋亭罄千金市其方。祕不輕授。予懇其弟退谷。始得其術。因錄之以濟貧。珠參切片。每五錢以附子三分。研末拌勻。將雞蛋一個去黃白。每殼納參片五錢。封口。用雞哺待小雞出時取出。將筆畫

一團於蛋上作記。如此七次。共成七圈。其藥卽成矣。每遇垂危大症。并產蓐無力吃參者。煎服五錢。力勝人參。并能起死回生。較臘狐心功力尤捷。不得少服。約人以五錢爲率。每次須多做數兩救人。濟陰保元湯。醫鈴。此方理脾化邪。生氣引氣生血。爲調經聖藥。滇珠參三錢。以米仁四錢。拌水蒸透。咀片。再入薑。加米仁汁蒸曬乾。用懷生地一兩。砂仁酒薑三味。拌蒸九曬收。再以瓦焙爲炭。當歸四錢。白芍三錢。酒炒川芎二錢。去淨油。米泔水浸洗。收乾。再入酒浸丹參四錢。酒洗透。茺蔚子四錢。酒蒸透。香附三錢。以薑土醋鹽童便甘草水乳汁逐次製過。用雲白朮五錢。陳土炒女貞子三錢。以白芥車前水浸乾用。如氣血熱。加丹皮生地。氣血寒。加肉桂數分。不真確之寒熱而先後至者。照本方。如經閉。無分婦女。本方加牛膝。

太子參

從新云。雖甚細小。卻緊而堅實。力不下大參。

百草鏡云。太子參卽遼參之小者。非別種也。乃蘇州參行從參包中揀出短小者。名此以售客。味甘苦。功同遼參。

羅浮參

羅浮山志。羅浮所產人參。殊與本草人參不類。狀如仙茅。葉細莖圓。有紫花。三葉一花者爲仙茅。一葉

一花者爲人參。根如人字。色如珂玉。煮汁食之。味與參無別。但微有膠漿耳。

味甘帶苦。生津養胃。補虛羸。潤肺。

西洋參

藥性考。西洋參似遼參之白皮泡丁。味類人參。惟性寒。宜糯米飯上蒸用。甘苦。補陰退熱。薑製。益元扶正氣。○從新云。出大西洋佛蘭西。形似遼東糙米參。煎之不香。其氣甚薄。若對半攤開者。名片參。不佳。反藜蘆。入藥選皮細潔。切開中心不黑。緊實而大者良。近日有嫌其性寒。飯鍋上蒸數十次而用者。或用桂圓肉拌蒸而用者。忌鐵刀火炒。

苦寒微甘。味厚氣薄。補肺降火。生津液。除煩倦。虛而有火者相宜。

腸紅。類聚要方。用西洋參蒸桂圓服之。神效。

東洋參

汪玉子言。東洋參出日本東倭地。其參外皮糙中油。熟蒸之。亦清香。與遼參味同。微帶羊羶氣。入口後微辣。爲各別耳。然性溫平。與西洋佛蘭參性寒平者又別。此參近日頗行。無力之家。以之代遼參用亦有效。每枝皆重一錢許。亦有二三錢者。總以枝根有印日本二字名。價八換。無字價五換。蓋有印字者。乃彼土之官參。最道地。無印者。皆彼土之私參也。亦有通身皮糙。內肉白色者。不佳。桂圓肉拌蒸曬用。

○癸丑三月予在李燮堂先生處見有東洋參二種一種大者粗如拇指儼似西洋參最堅實多肉一種小者每枝不過二三分亦有分許者肉薄不甚堅實據言二種皆日本洋客帶來新時俱色白皮皆有皺紋其大者切片口含過夜皆化而無滓小者含口中三夜皆不化大者煎湯色淡少味小者反濃厚二種俱出日本倭地而小者何以色味獨厚豈生產之土又不同耶又一種亦出東洋近奉天旅順等處者皮上有紅紋云彼倭國中亦珍之言其力更十倍於此舶商多以貴價售得轉販中土今蘇州有東洋參店專市此參者蓋因上年壬子冬江浙疫痘遍染小兒死者不下千百計有教服東洋參能助漿解毒服之果驗遂大行於時入藥內須飯鍋上蒸透曬乾用磁餅收存方免蛙壤○又一種東洋參出高麗新羅一帶山島與關東接壤其參與遼參真相似氣亦同但微薄耳皮黃紋粗中肉油紫屠舞夫攜來予曾見之據云性溫平索價十換言產蔚服之最效其力不讓遼參也○五雜俎人參出遼東上黨者最佳頭面手足皆具清河次之高麗新羅又次之今生者不可得見入中國者皆繩縛蒸而夾之故上有夾痕及麻線痕也新羅參雖大皆用數片合而成之功力反不及小者擇參取透明如肉及近蘆有橫紋者則不患其偽矣

昭參

金沙江志卽人參三七產昭通府肉厚而明潤頗勝粵產形如人參中油熱一種王子元官於滇曾以

此遺外舅稼村先生予親見之。狀較參紅潤。大小亦不等。味微苦甜。皮上間有帶竹節紋者。劉仲旭少府云。昭通出一種名蘇家三七。儼如人參。明潤紅熟。壯少者服之作脹。惟六十以外人服。則不腹脹。其功大補血。亦不行血。彼土人患虛弱者。以之蒸雞服。取大母雞用蘇三七煎湯。將雞煮少時。又將三七渣搗爛入雞腹。用線縫好。隔湯蒸至雞爛。去三七食雞。可以醫勞弱諸虛百損之病。據所言。卽昭參也。○宦遊筆記。三七生廣西南丹諸州番峒中。每莖上生七葉。下生三根。故名三七。土人入山採根暴乾。色微黃。形似白芨。長而有節者。其味微甘而苦。頗類人參。人參補氣第一。三七補血第一。味同而功亦等。故人並稱曰人參三七。爲藥品中之最珍貴者。此常中丞筆記所言。人參三七以形圓而味甘如人參者爲真。其長形者。乃昭參水三七之屬。尙欠分晰也。○識藥辨微云。人參三七。外皮青黃。內肉青黑色。名銅皮鐵骨。此種堅重。味甘中帶苦。出右江土司。最爲上品。大如拳者。治打傷。有起死回生之功。價與黃金等。○沈學士云。竹節三七卽昭參。解醒第一。有中酒者。嚼少許。立時卽解。又近時人參三七中。有名佛手山漆者。形長儼如佛手。上有指出廣西。藥客販至。其價在圓山漆之上。此名拳。齊山漆。卽所稱銅皮鐵骨參三七也。壬戌有客自打箭爐來。帶有藏三七名佛手參。儼如乾麥冬而堅實。形小不大。作三叉指形。玲瓏如手。故名。王聖俞嘗其味。淡而微辛涼。云能治肺血勞損。此亦白芨三七之屬也。○浙產台溫山中。出一種竹節三七。色白如僵蠶。每條上有凹痕如臼。云此種血症良藥。庚申予於晉齋處見瓊州山漆。圓

如芋皮光色黃白肉黃如金云瓊人珍之名野山漆勝右江所出者又一種出田州土司如佛手形名佛手三七云此種係野生入藥更勝○百草鏡云人參三七味微甘頗似人參入口生津切開內瀝青色外皮細而綠一種廣西山峒來者形似白芨長者如老乾薑黃有節味甘如人參亦名人參三七又名竹節三七此外又有旱三七名蘿蔔三七色白味苦有小三七色黑出湖南寶慶府亦名紅三七有羊腸三七卽水三七之類形如羊腸細曲又一種出雲南昭通者能亂人參色味無異且油熟明透但少蘆耳然回味太甜金御乘云近時市品三七之外有水三七有白芷三七有竹節三七其形狀功效皆未見其有考核者

味甘苦同人參去瘀損止吐衄補而不峻以未摻諸血中血化爲水者佳大能消瘀療跌撲損傷積血不行以酒煎服之如神

按人參三七出右江土司邊境形如葶薺尖圓不等色青黃有皮味甘苦絕類人參故名彼土人市入中國輒以顆之大小定價每顆重一兩者最貴云百年之物價與遼參等餘則每顆以分計錢計者價不過一二換而已昭參無皮形如手指絕無圓小者間有短扁形者亦頗類白芨樣金沙江志所載以爲卽人參三七恐未確故附存劉說以備考

治吐血種福堂方用雞蛋一個打開和人參三七末一錢藕汁一小杯陳酒半小杯隔湯燉熟食之

不過二三枚自愈。

七寶散。仇氏傳方。刀傷收口。用好龍骨。象皮。血竭。人參。三七。乳香。沒藥。降香末。各等分。爲末。溫酒下。或摻上。

陳氏回生集。載軍門止血方。人參。三七。白蠟。乳香。降香。血竭。五倍。牡蠣。各等分。不經火。爲末。敷之。

菊花參

產雲南東川府巧家汛江邊。葉似菊花。

功用同人參。力較遜。

紅毛參

百草鏡。漳泉估舶從紅毛帶來。絕不類參形。長而粗。長者有三四尺。色紫黑。粗者如拇指。折之中有白點痕。有起花紋。與建參相似。

止瀉痢如神。

煤參

出陝西西安等處。形如參。皮心俱青黑。故名。施柳南太守云。此參出陝西華山。食之多吐人。其性亦劣。味微苦甘。同人參。功力則薄耳。

建參法落梅附。

藥性考。福參出閩浙。頗似人參。而性味辛熱。虛寒病宜之。歌云。又有福參。辛苦甘齊。性溫益氣。虛冷人宜。註。福參多食則喉痛。故知性熱。○乙未。予館刻川。故鄆屬也。聞有市建參者。往覓得之。儼如臺參中。油熟一種大者。惟不能純透。亦有蘆。無竹節紋。味亦苦甘。以竹刀剖之。心空。不似遼參之堅實。劉贊之自閩回言。閩中近日大行。亦清補。兄患風火牙疼。煎湯漱口立愈。則性又帶寒散。或言其性熱者。猶未確也。○金御乘云。建人參性熱。獨不宜於產婦。與遼參形色氣味真相似。但遼參入口回味生津。此則回味稍瀟。故功用亦殊。河南出光山參。嵩山參。儼與遼產無別。惟嚼之有渣。不糯。味亦淡。

法落梅

金沙江志。產雲南東川府法戛地。○己酉。友人王鼎條患心腹痛。有客從滇帶此物來。呼爲法落梅。用根。其形儼如上黨參。色亦黃白。味甘苦。服之疾愈。據云。彼中人皆名法落梅。而不知諸書何以作梅字。耶。蔡雲白言。建參閩人呼法落梅。

治心痛如神。

土人參

各地皆產。錢塘西湖南山尤多。春二三月發苗如蒿艾。而葉細小。本長二三寸。作石綠色。映日有光。土

人俟夏月採其根以入藥。俗名粉沙參。紅黨即將此參去皮淨煮極熟陰乾而成。味淡無用。準繩劫癘消毒散用之。呼爲百丈光。

甘微寒。須蒸之極透。則寒去。氣香味淡。性善下降。能伸肺經治節。使清肅下行。補氣生津。治咳嗽喘逆。痰湧火升。久瘧淋瀝。難產經閉。瀉痢由於肺熱。反胃噎膈由於燥瀆。凡有升無降之症。每見奇效。以其根一直下行。入土最深故也。

脾虛下陷。滑精夢遺。俱禁用。以其下行滑竅。孕婦亦忌。

白帶初起。百草鏡。土人參切片三兩。用陳紹酒飯上蒸熟。分作三服。吃完卽愈。
王安采藥方云。土人參補陰虛。對配茯苓熬膏。治楊梅結毒。酒煎服。

上黨參防黨附。

本經逢原云。產山西太行山者。名上黨人參。雖無甘溫峻補之功。卻有甘平清肺之力。不似沙參之性寒。專泄肺氣也。○百草鏡云。黨參一名黃參。黃潤者良。出山西潞安太原等處。有白色者。總以淨軟壯實味甜者佳。嫩而小枝者。名上黨參。老而大者。名防黨參。
味甘性平。治肺虛。能益肺氣。

防風黨參

從新云。古本草云。參須上黨者佳。今真黨參久已難得。肆中所市黨參。種類甚多。皆不堪用。惟防黨性味和平。足貴。根有獅子盤頭者。真硬紋者。僞也。白黨即將此參煮曬以成。原汁已出。不堪用。○翁有良辨誤云。黨參功用。可代人參。皮色黃而橫紋。有類乎防風。故名防黨。江南徽州等處。呼爲獅頭參。因頭大而圓凸也。古名上黨人參。產於山西太行山潞安州等處。爲勝。陝西者次之。味甚甜美。勝如棗肉。近今有川黨。蓋陝西毗連。移種栽植。皮白味淡。類乎桔梗。無獅頭。較山西者迥別。入藥亦殊劣。不可用。味甘平。補中益氣。和脾胃。除煩惱。解渴。中氣微虛。用以調補。甚爲平妥。

南沙參

藥性考。南沙參形粗似黨參而硬。味苦性涼。清胃瀉火解毒。止嗽寧肺。○從新云。南沙參色稍黃。形稍瘦小而短。近有一種味帶辣者。不可用。○張璠本經逢原云。沙參有南北二種。北者質堅性寒。南者體虛力微。

功同北沙參。而力稍遜。

按參類不一。有竊參名者。如苦參沙參是也。有竊參形者。如薺芘三七是也。凡參皆隨地運爲升降。故各地皆產參。而性亦各異。功用總不及遼參。今擇可入藥爲綱目。未及載者。悉附識於此。以廣知焉。○張觀齋云。珠兒參者。其形獨蒜似之。去皮煮熟。色如紅熟人參。因圓大。而如珠。故名。其味苦而微帶辛。

不知何根子所造。價每觔五錢。治牙痛有驗。大略苦者性寒。而辛者必散。是火鬱發散之意。未必全在補功也。至於紅黨參。卽紅蘿蔔草所造。白黨參未考。此皆蘇地好奇者所製。好奇之醫。因而用之。走方者所以惑鄉人。稱太子參者。乃參中之全枝而小者。是參客巧取之名也。洋參清氣同參。味苦必寒。疑產陰山。補功雖不及人參。較之珠兒紅白黨等遠矣。土人參俗名觀音山貨。形與人參無二。亦有糙熟之分。出處不一。中有白絲心而味淡。親見台溫處州及新昌嵯縣人有貨此參者。價每兩兩許。未考其性。亦未用過。如南沙參誤用者甚多。南沙參產於浙地者。鮮時如蘿蔔。土人去皮煮熟。如熟山藥。曬乾如天花粉。而無粉性。本名粉沙參。功專散毒消腫排膿。非南沙參也。其南沙參形如桔梗。而中空鬆。味淡微甘。桔梗帶辛。而南沙參不辛。產於臺門者最佳。俗名雄桔梗。藥肆中卽於桔梗包中揀出。水潤打扁切片。確類銀柴胡片。此則入肺而理嗽。功如北沙參而兼理氣。蓋中空之義也。台州亦出桔梗。而條幹帶硬。亦有雄桔梗。如南沙參。但色不如毫產者白。蓋參類本不一。近日價日昂貴。而各種僞品雜出。人亦日搜奇。於窮巖荒壑中覓相似草根以代混。倘誤用之。爲禍非淺。王釋堂云。時下盛行一種福建長樂參。廣西南陔參。二物頗似。儼與臺參油熟無別。味亦苦中帶甜。蒸湯亦極濃厚。然皆性熱。不似人參之平和滋益也。卽臺參中。近日人頗有入白糖及滴水製透。取其重也。凡參八分。可製重二分作一錢。以圖利。店中有此參者。每日必蒸焙。否則潮潤難售。故市參者須加意焉。

於朮

卽野朮之產於潛者。出縣治後鶴山者爲第一。今難得。價論八換。其形有鶴頸鶴頭。羽翼足俱全。皮細帶黃。切開有硃砂點。其次出北鄉。皮色帶黑不黃。茅翼云。產徽州者皆種朮。俗稱糞朮。乃糞力澆灌大者。肥而無鶴頸。野生者名天生朮。形小有鶴頸甚長。內有硃砂點。朮上有鬚者尤佳。以得土氣厚也。於朮亦野生。出於潛。產縣治龍脈土上者。其內點真似硃砂。猩紅如灑血。鶴頸肉蘆乾之清香。產他處。內或無點純白。或有黃點。總不及龍脈上產者爲上品。冬月採取。形味方全。一種江西朮。其形甚小。與野朮相似。雖有鶴頸而甚短。其體堅實。其味苦劣不可用。○萬歷杭州府志。白朮以產於潛者佳。稱於朮清異錄。潛山產善朮。以其盤結醜怪。有獸之形。因號爲獅子朮。○西吳里語。孝豐天目山有仙丈峰。產吳朮。名雞腿朮。入藥最佳。○百草鏡云。白朮一莖直上。高不過尺。其葉長尖。傍有鍼刺紋。花如小薊。冬採者名冬朮。汁歸本根。滋潤而不枯燥。卻易油。不能止瀉。春採夏採者。藏久雖不易油。卻枯燥不潤。肉亦不飽滿。凡收朮須陰乾勿曬。曬則爛。野朮形小。蘆梗細硬。皮細。若蘆軟而粗。卽種朮矣。又有象朮。係台朮中揀出如野朮者。但切開有暈紋。台朮雖種而不用糞。故不肥大。服之不脹。倘野朮難得。此爲穩。安徽宣城歙縣亦有野生朮。名狗頭朮。亦佳。又一種係取野朮種。灌以糞。形雖大。皮卻細緊。出樟村。較徽省種朮稍好。今人論野朮云。黑土者真。不知土色各處不同。不可執一而論。又云。小者真。然老山貨。

年久亦有大者。又云有硃砂斑者。真不知於朮亦有無硃砂斑者。據土人言。產縣後山脈及黃塘至遼東橋一帶。西流水四十里地之朮。方有硃砂點。他處則無。但野朮入口。甜味雖重。氣極清香。自不同也。總以白爲佳。以潤爲妙。○葉天士本草云。浸刮。飯鍋上蒸曬如棗黑。黃土炒。爲中宮和氣補脾之藥。○本經逢原云。雲朮肥大氣壅。台朮條細力薄。寧國狗頭朮皮赤稍大。然皆栽灌而成。故其氣濁。不若於潛野生者。氣清。無壅滯之患。入風痺痰溼利水破血藥。俱生用。然非於潛產者。不可生用也。○張觀齋云。今有一種野朮。深山處必有。形如於朮。切開有硃砂斑。香而不甜。細考其味。親見其苗。乃天生之蒼朮也。因久無人採。故大而宛如於朮。大凡朮以火焙乾者。味必苦。生曬者。味必甜。台朮以及各處種朮。皆於朮所種而變者。功雖不如於朮。服亦有驗。今於朮絕少。市中皆以仙居所產野朮充於朮。功亦相等。○辛亥五月。有客自青田縣來。帶有天生朮。大小如一。約重兩許。俱生者。未經日曬乾焙。若乾之。可三錢許。其朮形儼如仙鶴。翹足皆具。亦有長頸。頸皆左顧。一一相似。無作磊塊形者。詢之云。此朮不生於土。所生之地。係青田邊境。有一山。山有石壁。壁上每年生此朮。二三十觔。不能多有。○吾杭西北山近留下小和山一帶地方。及南高峯翁家山等處。皆產野朮。氣味香甜。生啖一二枚。終日不飢。生津溢齒。解渴醒脾。功力最捷。切開無硃砂點。膚理膩細。而白如雪色。名曰玉朮。又呼雪朮。亦不易得。入藥功效。與於朮等。較他產野朮尤力倍也。

甘補脾。溫和中。補氣生血。無汗能發。有汗能止。開胃補脾。則能進飲食。去勞倦。止肌熱。化癥癖。和中能已嘔吐。定痛安胎。燥溼。利小便。生津液。止泄瀉。化胃經痰水。理心下急滿。利腰臍血結。去周身溼痺。凡下焦陰氣不脫。上焦陽氣驟脫者。無力用參。重用野朮。大能起死回生。用糯米泔浸。陳壁土炒。或蜜水炒。人乳拌用。炒黃不宜焦。焦則無力矣。熬膏更良。禁忌同白朮。

代參膏。楊春涯驗方。於朮十觔。白米泔水浸三晝夜。洗淨浮皮。蒸曬十次。有脂沾手爲度。切片熬膏。一火收成。滴紙不化。用白茯苓十觔。舂末水飛去浮。只取沈者。蒸曬十次。沾手如膠。與朮膏攪勻。每服兩許。米湯送下。

治虛弱枯瘦。食而不化。用於朮酒浸。九蒸九曬。一觔。菟絲子酒煮吐絲曬乾。一觔。共爲末。蜜丸。梧子大。每服二三錢。

四製仙朮散。治盜汗不止。此藥如神。於朮四兩。分四製。一兩黃芪煎汁炒。一兩牡蠣粉炒。一兩麩皮湯炒。一兩石斛湯炒。只取朮爲末。服三錢。粟米湯下。

各色痢疾。傳信方。於朮一兩。老薑一兩。當歸五錢。水二盃。煎好。露一宿。服。自愈。

保胎丸。良方集要。茯苓二兩。條芩一兩。於朮土炒一兩。紅花一兩。沒藥三錢。製香附一兩。元胡索醋炒一兩。益母草去根一兩。共研末。蜜丸。桐子大。早晚白滾水服七粒。不宜增減。戒惱怒勞傷。生冷發氣。

等物。凡遇腹痛腰酸作脹。卽宜服之。成孕三月。卽服起。直至足月。不但保胎。卽臨產亦可保易生無恙。
方內紅花元胡索二味皆是行血滑胎之品分兩太重每味只可二錢方合本方君臣用者詳之。

三日瘡。古今良方。九製於朮一觔。廣皮八兩。熬膏。用飴糖四兩收。

又方。專治四日兩頭。或一二年至三四年不愈者。或愈而復發。連綿不已者。用於朮一兩。老薑一兩。水煎。發日五更溫服。卽愈。重者二服。永不發矣。

北雲朮

邊塞志。產遼東口外五國城等處。此朮初生土中。並無枝葉。生於暗地者多。城北最盛。天氣晴和。則掘地求之可得。色如枯楊柳。大小如筍。蔓延數十步。屈曲而生。此地病人無藥物。凡有疾者。煎此朮湯服之。自愈。又可占病人之吉凶。若煎沸數次。藥浮者。病卽愈。半浮半沈者。病久不愈。土人以此驗之。

治風寒傷食一切病。

南連 仙姑連 天姥連

一名土連。浙溫台金華山中俱有之。出處州者。名處連。以形大毛輕者好。性較川連尤寒。北人市去爲馬藥。○百草鏡。土黃連。二月發苗。根葉與羊蹄大黃無異。但短小耳。三月抽莖。高有尺許。花細成穗。結實初青。後紅。子藏稜中。夏至後枯。出浙江者。名慈連。安徽寧國府宣城出者。粗肥。名宣黃連。

性寒而不滯。入膏丹用最良。

吉氏家傳。血痢用宣連爲末。以雞子搜作餅。炭火煨令通赤。蓋定勿泄氣。候冷研細。空心米飲下五分。大人一錢。以意加減。按宣連。卽今江浙東西一路所產黃連。皆當日宣州路也。

仙姑連

出台州仙居縣。邑人相傳吳魏時蔡經居此。故以名邑。王方平曾偕麻姑降其宅。今遺址猶存。其地產黃連。粗如雞距。皆作連珠形。皮色青黃。光潔無毛。味大苦寒。折之有煙。色如赤金者佳。療火症更捷於川產者。馬藥非此不可。

天姥連

出天台。皮色鼠褐。略有毛刺。味苦。入口久含有清甘氣。

大瀉心火。性寒而帶散。故治目症尤效。

水黃連

川中一種黃連。生於澤旁。週身有黃毛如狗脊毛狀。名水黃連。頗細小。醫家不知用。市人以之僞充真。川連出售。惟祝氏效方用之。○百草鏡。水黃連打箭爐出者。形細長。少硬刺。較重於他連。以皮肉帶青色者爲佳。出小西天者。色黑有毛者佳。無毛光黃者次之。

治鼻疳。用百部三錢。切片曬乾炒。取淨末二錢。地骨淨炒二錢。五倍子炒。黃蘗炒。甘草炒。各二錢。水黃連切片炒一錢。共爲末。如鼻疳爛通孔者。以此調香油搽。立結痂愈。

馬尾連

出雲南省。藥肆皆有之。乾者形如絲。上有小根頭。土人盤曲之以市。

性寒而不峻。味苦而稍減。不似川連之厚。性能去皮裏膜外及筋絡之邪熱。小兒傷風及痘科用。

浙烏頭 卽僧鞋菊

此乃烏頭之產於浙地。錢塘覓橋人種之。市爲風痰藥。近日人家園圃亦有之。名鸚鵡菊。又曰僧鞋菊。追風活血。取根入藥酒良。

霍石斛 五色石斛附

出江南霍山。形較釵斛細小。色黃。而形曲不直。有成毬者。彼土人以代茶茗。云極解暑醒脾。止渴利水。益人氣力。或取熬膏餉客。初未有行之者。近年江南北盛行之。有不給市賈率以風蘭根僞充。但風蘭形直不縮。色青黯。嚼之不黏齒。味微辛。霍石斛嚼之微有漿。黏齒。味甘微鹹。形縮者真。○百草鏡。石斛近時有一種形短祇寸許。細如燈心。色青黃。咀之味甘。微有滑涎。係出六安州及潁州府霍山縣。名霍山石斛。最佳。咀之無涎者。係生木上。不可用。其功長於清胃熱。惟胃腎有虛熱者宜之。虛而無火者忌。

用。○年希堯集驗良方。長生丹用甜石斛。卽霍石斛也。范瑤初云。霍山屬六安州。其地所產石斛。名米心石斛。以其形如累米。多節。類竹鞭。乾之成團。他產者不能米心。亦不成團也。

甘平微鹹。陳廷慶云。本草多言石斛。甘淡入脾。鹹平入胃。今市中金釵及諸斛俱苦而不甘。性亦寒。且形不似金釵。當以霍斛爲真。金釵斛。○清胃除虛熱。生津已勞損。以之代茶。開胃健脾。功同參芪。○定驚療風。能鎮涎痰。○解暑。甘芳降氣。

五色石斛

雲南志。產祿勸州。普渡河。瀕江石壁間。色紺紅者佳。

療胃熱。益虛羸。

銀柴胡

經疏云。俗用柴胡有二種。一種色白黃而大者。名銀柴胡。專用治勞熱骨蒸。色微黑而細者。用以解表發散。本經並無二種之說。功用亦無分別。但云銀州者爲最。則知其優於發散。而非治虛熱之藥明矣。本草匯。柴胡產銀夏者。色微白而軟。爲銀柴胡。用以治勞弱骨蒸。以黃牯牛溺浸一宿。曬乾。治勞熱試驗。○本經逢原云。銀柴胡。銀州者良。今延安府五原城所產者。長尺餘。肥白而軟。北地產者。如前胡而軟。今人謂之北柴胡。勿令犯火。犯火則不效。○百草鏡云。出陝西寧夏鎮。二月採葉。名芸蒿。長尺餘。微

白力弱於柴胡。○藥辨云。銀柴胡出寧夏鎮。形如黃芪。內有甘草串。不可混用。○翁有良云。銀柴胡產銀州者佳。有二種。但辨形如鼠尾。與前胡相等。查前胡與柴胡相類。皆以西北出產者爲勝。形既相同。當以湖廣古城柴胡爲準。今銀柴胡粗細不等。大如拇指。長數尺。形不類鼠尾。又不似前胡。較本草不對。治病難分兩用。究非的確。用者詳之。○金御乘云。銀州柴胡軟而白。北產亦有白色者。今人以充白頭翁。此種亦可謂銀柴胡。蓋銀指色言。不指地言。猶金銀花白色者曰銀花是也。銀柴胡原有西產北產之分。不必定以銀夏者爲銀柴胡也。然入藥以西產者勝。○按綱目註。銀柴胡以銀夏出者爲勝。不知今人所用柴胡。有北柴胡南柴胡之分。北產如前胡而軟。南產強硬不堪用。又銀柴胡雖發表。不似柴胡之峻烈。綱目俱混而未析。

甘微寒無毒。行足陽明少陰。其性與石斛不甚相遠。不但清熱。兼能涼血。和劑局方治上下諸血。龍腦雞蘇丸中用之。凡入虛勞方中。惟銀州者爲宜。北柴胡升動虛陽。發熱喘嗽。愈無寧字。可不辨而混用乎。按柴胡條下。本經推陳致新。明目益精。皆指銀夏者而言。非北柴胡所能也。

周一士云。凡熱在骨髓者。非銀柴胡莫療。

治虛勞肌熱。骨蒸勞瘡。熱從髓出。小兒五疳羸熱。

燕窩

產江西撫州中心有孔者是。

辛溫無毒。逢原云性最升散。專於開鬱寬胸。通行經絡。鬱在中焦。則胸膈痞滿作痛。須撫芎開提其氣以升之。氣升則鬱自降。故撫芎總解諸鬱。直達三焦。爲通陰陽氣血之使。然久服耗氣。令人暴亡矣。○按芎藭有數種。蜀產曰川芎。秦產曰西芎。江西爲撫芎。綱目取川芎列名。而西芎撫芎僅於註中一見。亦不分其功用。蓋芎藭以蜀產爲上。味辛而甘。他產氣味辛烈。遠不逮矣。殊不知西芎與川芎。性不甚遠。俱爲血中理氣之藥。第西產不及川產者力厚而功大。至撫芎則性專於開鬱上升。迥然不同。故石頑於川芎下另立撫芎一條。以明不可混。今從之。

芎歸飲。不藥良方。治失血湧吐。因飽食用力。或因持重勞傷脈絡。用當歸二兩或三兩。酒浸洗。撫芎一兩。微炒。水三盃。酒一盃。半煎至八分。作二次服之。取其引血歸經。並治跌撲墮打而傷脈絡。令人大吐者。二症中如有瘀血。或加大黃下之。或加桃仁紅花破之。或加鬱金黃酒行之。審症酌加。其效更速。普濟方。一切熱癰時毒腫痛。撫芎煨研。入輕粉麻油調塗。

土藜蘆

汪連仕云。卽千葉水仙花。黃白者入藥。紅者不可服。取根罌毒。曬燥研末。合通關散搐鼻。令人吐痰。一切風症多可用之。

綠升麻

從新云。乃升麻之別一種。繆仲醇廣筆記。用治下痢。每每有驗。性最靈捷。治痢疾下傷。

按升麻色綠者佳。非另一種也。

金鐘薄荷

汪連仕草藥方云。卽細葉薄荷。山產者根堅硬。以米醋磨敷。蜂刺蟲叮。蜈蚣咬。葉。治跌打損傷。腹蟲牙痛。煎湯咽之。

王安采藥方。金鐘荷葉卽薄荷。止吐血。黃疸。跌打。諸般風氣。合濟陰丸。

白毛夏枯草

產丹陽縣者佳。葉梗同夏枯草。惟葉上有白毛。今杭城西湖鳳凰山甚多。性寒味苦。專清肝火。

山牛膝

一名蘇木紅。今人呼荔支紅。又名透血紅。產富陽竹園內。善能理瘡。并刀箭入肉。活血。化瘀。寬筋。理跌打損傷。治破傷風。七十二般惡疾。非此不除。功勝川產。汪氏方。

土連翹 巴山虎附。

乃鬧羊花子也。鬧羊花卽黃杜鵑。一名石棠花。牛食之卽瘋顛。富陽北泥山白洋溪一帶山中甚多。彼土人呼爲石棠花。卽黃色映山紅也。○百草鏡云。殼似連翹。子類芝麻。故一名山芝麻。入藥每服三分。不可多服。方術家麻藥中有之。其根名巴山虎。入藥去骨用。

汪連仕草藥方。土連翹卽鬧羊花子。今呼爲南天竺草。

苦溫。治風寒溼痹。癰腫脹。撲損疼痛。疽毒疔瘡。用之神效。汪連仕草藥方。治跌打損傷。能活血疏風。理七十二般風氣。爲外科聖藥。

透骨丹。藥鑑。治跌撲損傷。深入骨髓。或隱隱疼痛。或天陰則痛。或年遠四肢無力。此藥主之。眞神方也。鬧羊花子一兩。火酒浸炒三次。童便浸二次。焙乾。乳香沒藥不去油。血竭各三錢。爲末研勻。再加麝香一分同研。磁瓶收貯封固。每服三分。壯者五六分。不必吃夜飯。須睡好方服。酒可盡量下。服後避風。有微汗出爲要。忌房事酸寒茶醋等物。弱者間五日一服。壯者間三日一服。○按吉雲旅抄。有治無名腫毒疔瘡發背一醉消奇方。用山芝麻三分。研極細末。以好酒煎數沸。帶渣服下。蓋被出汗。不可見風。一服全消。但不可用燒酒。則又與藥鑑製法異。並附於此。善用者擇之。

將軍復戰丹。張雲野瑣記。治跌打損傷。以山芝麻二十兩。童便浸四次。燒酒浸三次。略炒。乳香沒藥各炙去油三兩。血竭煨二兩。爲極細末。火酒送下四分。隨食白煮豬肉壓之。如持齋者。食白腐乾。服藥後。切記避風。

七釐散。吳興楊氏便易良方。治金刃傷。止痛如神。用龍骨。礪砂。血竭酒洗。兒茶。天芝麻。卽土連翹。各五分。爲細末。每服七釐。

十全丸。菴竹堂驗方。治風痺跌撲。癰疽初起。一服卽能消散。惟虛弱人須先補。而後用此攻之。麝香三錢。穿山甲土炒脆。廣木香生研。血竭另研。雄黃水飛。山芝麻酒炒。番木鱉黃土炒。焦黃爲度。不可太枯。篩取淨末。自然銅火煨醋淬九次。研細水飛。殭蠶炒。去絲去頭足。以上各一兩。川蜈蚣去尾二十一條。酒炙爲末。蜜丸桐子大。以硃砂爲衣。金箔裹之。蠟丸封固。每用一丸。至重者再進一丸。用羌活紫蘇酒煎化服。取汗避風。否則發戰傷人。一方去木鱉子。加風茄花五錢。山芝麻亦用五錢。較穩。

馬前散。救生苦海。治癰疽初起。跌撲內傷。風痺疼痛。其效如神。番木鱉忌見鐵器。入砂鍋內。黃土拌炒。焦黃爲度。石臼中搗磨。用細篩篩去皮毛。揀淨末。山芝麻去殼酒炒。各五錢。乳香末。箬葉烘出汗。五錢。穿山甲黃土炒脆。一兩。每服一錢。酒下。不可多服。服後避風。否則令人發戰慄不止。如人虛弱。每服五分。

五虎丹。治風痺跌撲。腫毒初起。草烏去皮。薑汁拌曬。隔紙炒。山芝麻燒酒拌曬炒。雄黃水飛。血竭箬葉上烘燥。穿山甲砂炒。各一兩爲末。丸如芥子大。酒下二三分。不可多。此方見草寶真劫劑也。

巴山虎

卽鬪羊花根也。衆妙方名巴山虎。

追風定痛。

神妙草頭痧藥。行篋檢祕。鵝不食草并子一兩。南星半夏藜蘆漏蘆牙阜鬪羊花子鬪羊花根各一錢。俱曬燥磨極細末。此藥專治中暑中寒。中風不語。牙關緊閉。急慢驚風。小兒筋抽。將藥吸入鼻內。噴嚏來立時甦醒。亦可用陰陽水調服二三分立愈。

薰痔漏仙方。不可刀鍼掛線及服藥丸散。用鬪羊花根。俗名老虎花。像杜鵑。色黃。其根如鐵。將此根搥碎。煎湯放罐內。置桶中。蓋上挖一孔。對痔坐定。燻之。湯冷復熱之。再燻。其管觸藥氣。自漸漸潰爛。不堪燻。半月自愈。重者一月收功。永不再發。切不可洗。

治兩腮紅腫。梁氏集驗。百合一個。山芝麻根去皮。貝母。元明粉。各一錢。銀硃七分。加白麩調敷。

土茜草

一名地蘇木。過山龍。風車草。此南方所產。蒨草也。葉四五瓣成一叢。攢莖節而生。方梗柔蔓。皮糙澀棘。人指獨莖直上一二尺。乃有分歧處。葉如箭鏃。風吹能環轉如車輪。故名。又名八仙草。以其葉相對攢簇。枝葉閒生也。其根黃赤色。不可染。又名活血丹。○百草鏡云。此草秋時結實。小如梧桐子。實後枯。立夏後發苗。

百草鏡。性平。入肝脾心經。治打傷跌壓。活血。性善行血。無瘀者禁用。○葛祖方。治風氣痛。通經下胎。黃

疽。鬼箭打。癩瘡。蛇傷。○藥鑑云。功專活血。治跌撲。癰毒。癥瘕。經閉。便血。崩中。帶下。痔漏。風痺。鬼箭風。癢。脹。黃疽。蛇傷。

疔瘡。朱羅峯方。過山龍。仙橋草。蒼耳草。豨薟草。紫花地丁。野苧麻根。六味等分。酒煎服。取汗。須多服。蟾酥九。汗出。鹹者可治。若味淡。不可治。

又方。地蘇木。陰乾爲末。重者八錢。輕者五錢。好酒煎服。如放黃者。沖酒服。渣罨疔上。

野苧麻

採藥志。天青地白草。又名川綿葱。卽野苧麻也。

一名銀苧。又名天名精。生山土河塹旁。立春後生苗。長一二尺。葉圓而尖。面青背白。有麻紋。結子細碎。根擣之有滑涎。入藥用根。取鬆土者良。肥白無筋。按此與地稜別。

性涼。治諸毒。活血止血。功能發散。止渴。安胎。塗小兒丹毒。通蠱脹。崩淋。哮喘。白濁。滑精。牙痛。喉閉。骨哽。疝氣。火丹。癩毒。胡蜂毒。蛇咬。發背。疔瘡。跌撲損傷。○救生苦海。午日取野苧麻。陰乾曬燥。搓熟。取白絨收藏。夏月遇有金刃傷者。敷之卽止血。且不作膿。○百草鏡。跌撲野苧根一兩。搗碎。好酒煎服。盡量飲醉。○漆瘡紅腫。合紫霞膏。又爲女科聖藥。痘毒。以野苧麻去皮搗敷。○癰疽發背。對口。一切無名腫毒。野苧麻搗汁。用無灰酒沖下。渣敷患處。露頭。蓋被出汗。卽出膿水全愈。

跌打閃挫方。教師白字亮傳。大鯽魚一尾。獨核肥阜一個。胡椒七粒。黃梔子九個。老蠶一片。蔥頭三個。野苧麻根一段。乾麪一撮。香糟一團。紹酒隨數用。同前藥合搗如泥。炒熱敷患處。立愈。外用布包紮緊。次日青出即愈。○救生苦海。治神鬼箭。用野苧麻川南星同搗敷。

徐若寧云。蛇虺咬看傷處有竅是雄蛇。無竅是雌蛇。以鍼挑破傷處成竅。然後取野苧麻嫩頭。搗汁和酒服之。三盞。絞刺渣敷傷口。能令毒從竅中出。傷立愈。將渣棄水中。永不復發。

鷄鴨腳艾

百草鏡。葉細多歧。間有關者。雜之薑蕤。如鷄鴨腳然。故名。搓之作艾香。

治腳氣疝氣。

千里光

一名九里明。一名黃花草。綱目附見千里及下。按千里光爲外科聖藥。俗諺云。有人識得千里光。全家一世不生瘡。綱目不載。入外科用。○百草鏡云。此草生山土。立夏後生苗。一莖直上。高數尺。葉類菊。不對生。○圖經云。千里光生淺山及路旁。葉似菊而長。背有毛。枝榦圓而青。春生苗。秋有黃花。不結實。采莖葉入眼藥。名黃花演。

治目不清。去紅絲白障。迎風流淚。百草鏡。○明目。去星障。煎湯浴瘡瘍。合膏點赤眼。貼楊梅瘡。狗咬。以

千里膏摻粉霜貼之。治蛇傷。治四塊鵝掌風。王三才醫便用千里光草一握。蒼耳草一中握。朝東牆頭草一小握。共入瓶內。水煎百沸。以手少擦麝香。向瓶燻之。仍用絹帛繫臂上。勿令走風。三次即愈。千里光卽金釵草是也。

治時疫赤鼻。聾耳火眼。諸瘡癰腫毒破爛。及鵝掌風。合千里光膏點赤眼。貼楊梅瘡。加狗油熬粉霜尤妙。王安采藥方。

小青草

五月生苗。葉短小。多莖。不甚高。開花成簇。紅色兩瓣。與大青同。但細小耳。一名蜻蜒草。一名蒼蠅翅。綱目小青條集解下。引圖經。生福州。三月生花。亦不載其形狀。未免失考。且主治亦別。○圃事須知。小青一名淡竹花。此則另是一種。

味苦大寒。理小腸火。治兒疳積。赤目腫痛。療傷寒熱症。時行咽痛。治疳積。煮牛肉田雞雞肝食之。疳疔。煮豬肝食。○黃疸。勞瘡發熱。○醫障初起。○百草鏡。小青草五錢。煮豆腐食。雀目。百草鏡。一名雞盲。白晝見物。將暮卽昏。雞肝或羊肝取一具。不落水。小青草五錢。安盃內。加酒漿蒸熟。去草吃肝。三服卽愈。加明雄黃五分尤妙。

澤半支

百草鏡。葉如鼠牙半支。生山澗處。葉皆對節。夏開黃花如瓦松。
治蛇咬疔腫。

狐尾草

汪連仕采藥書。狐尾草花如狐尾。九節而生。長水澤旁。名狐媚花。
主治吐血金瘡。取根數。一切腫毒。根菴洗瘡用藥。

金錢草

一名遍地香。佛耳草。俗訛白耳草。乳香藤。九里香。半池蓮。千年冷。遍地金錢。其葉對生。圓如錢。鉞兒草。葉形圓。二瓣對生。象鏡鉞。生郊野溼地。十月二月發苗。蔓生滿地。開淡紫花。開一二寸則生二節。節布地生根。葉四圍有小缺痕。皺面。以葉大者力勝。乾之清香者真。三月採。勿見火。綱目有積雪草。卽此。但所引諸書。主治亦小異。故仍爲補之。至綱目所載。言其治女子少腹痛有殊效。其方已載綱目。此不贅述。

味微甘。性微寒。祛風。治溼熱。百草鏡。跌打損傷。瘡疾。產後驚風。肚癰便毒痔漏。擦鵝掌風。汁漱牙疼。葛祖方。去風散毒。煎湯洗一切瘡疥。神效。採藥志云。發散頭風風邪。治腦漏白濁熱淋。玉莖腫痛。搗汁沖生酒吃。神效。

按蔣儀藥鏡云。佛耳草下痰定喘。能去肺脹。止哮喘嗽。大救金寒。以之列入熱部。豈以其氣辛耶。白虎丹。祝氏效方。鮮野淡菜。卽車前草。洗淨。加遍地香搗爛。用白酒和汁絞出。鵝毛蘸搽患處。卽消疥瘡。救生苦海。鉞兒草加鹽少許。搓熟。頻擦全化。然後洗浴。三次必愈。若用煎洗。反不見效。疔瘡走黃。毒歸心。○慈航活人書。銅錢草。卽遍地香。採葉搗爛。童便煎服。服後再飲好菜油二三盃。令吐。如吐。卽不必服矣。再加生豬腦一個。同白糝子搗勻敷。張介賓本草正。佛耳草。味微酸。性溫。大溫。肺氣。止寒嗽。散痰氣。散風寒。寒熱。亦止泄瀉。鋪艾捲作筒。用熏久嗽尤妙。

望江青

一名還精草。玉星草。銀腳鷺鷥。血見愁。穀雨後發苗。生澤旁湖岸。方莖中空。葉狹長而尖。有鋸齒。對節。小滿後抽莖。開花成穗。細紫層層而上。寒露時枯。根多鬚。節開方而白。極長。亦空明。根尤妙。王聖俞云。銀腳鷺鷥。葉似胡麻而小。直莖可尺許長。其葉對生。根絕類水芹。味甘而多津液。採而以蜜拌蒸食。治肺虛失音。及久服最益人。西湖諸山皆有之。據此則似另一種。蓋望江青根白而不長。若長者。乃銀腳鷺鷥也。並存以俟考。

李氏草祕。望江青。俗呼天芝麻。以其葉似芝麻葉也。方梗。對節生葉。至春節開紅紫花。生水溝澤邊。

形微似諸蘭草。

涼苦。百草鏡。性寒而味微苦。入肺經。吐血服之。生精還力。除溼熱。去星障。療肺癰。勞力傷。脫力黃。同金器煎服。愈驚風。

治打傷撲傷。最活血。搗汁沖酒服。渣罨傷處。一人閃足。痛不能舉。無苗。尋其根。搗汁入煎劑。三服而愈。同牛膝芍藥當歸獨活玉釵草活血丹七葉草五爪龍放棒行金雀腦覆絲藤撇草等。和勻搗汁。加酒服之。損傷垂死。但得入咽可生。並治諸爛痛瘡癬。吐血亦效。

目中去星翳障。百草鏡。望江青一兩。羊肝一具。同豆腐煮食。

吐血。白蜜二兩。隔湯頓熟。望江青一兩。煎汁沖蜜服。不論遠年新起。一切血症。二服除根。嘉慶三年。予僕孫成患血症甚劇。得此方而愈。但服此藥後。每服須吃桂圓五觔。二服吃十觔。方無後患。此藥服後。人如醉。惺惺然欲睡。一週時自愈。再得燕窩粥培元更妙。

乳癰乳核。秋泉家祕祖傳天下第一奇方。專治乳癰乳核腫硬大者。服之即內消。用九龍川即龍見怕一兩。細葉冬青即山黃楊五錢。龍爪紫金鞭即馬鞭草又名龍爪草一兩。金剪刀三錢。九節金絲草即望江青五錢。遍地金龍草即地五爪三錢。用無灰酒二盃。加香櫟葉或橘葉十餘片。煎鍾半。飢時隨量二三次服之。渣再煎服。

絕瘡。望江青乾者五錢煎酒服。

予表戚張石港。生平常服望江青。每日用乾者三錢。北棗六枚同煎食。如是三年。身輕腳健。終身無疾。其功不下參也。

無骨苧麻接骨草。麻衣接骨。紫接骨附。

卽玉接骨。一名血見愁。玉錢草。麒麟草。玉連環。葉小圓。根如水芹。生溼陰處。立夏時發苗。逢節則粗。葉尖長。根蔓延。色白多粗節。類竹根。搗之汁黏。高者尺許。鬆土種之。極易繁衍。入藥用根。百草鏡云。玉龍盤。一名無骨苧麻。葉類苧麻而薄小。背不白。莖如筍。色明透。至九月。莖白明如水晶。上有細紅點子。十月萎。探宜九月。一名玉梗半枝蓮。搗之有白漿稠滑。綱目蒟醬條釋名云。卽接骨草。蘇恭云。葉似芹。寇宗奭云。花白子青。十月子乃紅熟。有一二百子。時珍云。每枝五葉。按羣芳譜。則花白而葉不類。其根乃似水芹。今人搗汁。以續筋骨損折。頗驗。名玉接骨。當是此種。然綱目無一語治折傷。且所引形狀。率多含混。故特詳晰補之。

性涼。味甘淡。入肺經血分。治吐血腸紅下血。跌打損傷。采藥志云。接骨草。又名玉梗。金不換。性溫。能止血生肌。行肺經之惡血。引血歸經。理氣開胃。大有功效。

接骨草

苗如竹節。出廣西。粵語。此草叢生。高二三尺。葉大如柳而厚。莖有節。色綠而圓。花白。午開。自三月至九月不絕。羣芳譜。四季花。一名接骨草。葉細。花小。色白。自三月開至九月。午開。子落。枝葉搗汁。可治跌打損傷。九月內剖根分種。肇慶志。接骨草出封川陽江。一名四季花。生園林中。莖綠而圓。葉長如指而尖。花白。跌傷骨節。搗爛敷之。可以接骨。而本草不載。李氏草秘。羊耳草又名接骨草。生牆崖上。葉如羊耳。專治接骨。

麻衣接骨

生背陰山腳下。或澗旁。穀雨後發苗。葉類苧麻。背不白。對節生。節下則粗如鶴膝。作紫色。敏接接骨草數種。俱產深山澗隕旁。近地罕得。人家間有種之者。然麻衣接骨每不易得。玉接骨性涼味甘而補。能和中調血。生髓益津。其功不僅專治折損。麻衣接骨性溫而行血。惟專治折損。故人多不傳其種。辛亥。予館臨安。遊西徑山寶珠寺。見山門外遍隙地皆麻衣接骨。形狀儼如土牛膝。而粗處作紫黯色。甚脆。折之從粗節處斷。視之紫透中心。誠為佳草。不易得。而山僧土人悉皆莫識。故得滋育盈畦也。

治跌打損傷。

紫接骨

生山上。與麻衣接骨相似。而葉莖俱紫。治跌撲勞傷損瘀。

汪連仕云。金寶相。一名金鉢盂。罨金瘡之聖藥。又能散風透膿。一夜卽透。其葉如蝴蝶花。根如商陸。卽嫩皮葱。今呼麻葉接骨。敏按汪所論。當又是一種。亦非荔支草。而又不是似牛膝之一種接骨也。

鳳眼草花上細粉附。

此草苗如薄荷。葉微圓。長五六寸。穀雨後生苗。立夏後。枝極開。復生二小葉。節節皆有。至秋後。二小葉中心白色。儼如鳳眼。故名。八九月眼中開花。其花如鬚。長一二寸。紫黃色。亦可入藥。○百草鏡。鳳眼草。芒種後。其枝極開。二小葉中心各起蕊一粒。如人兩眼。細碎如石胡荽子狀。至小暑後。色轉紅黃。漸抽長如鬚。此草自苗至老。葉皆有淡紅暈。

敏按經驗廣集治小便不通。有阜角湯熏法。方中用鳳眼草。乃臭椿葉別名。與此名同物異。又荔支草亦名鳳眼草。與此亦異。

治一切風痹。活血去風。酒煎服立效。

室女乾血勞。用鳳眼草連根葉鮮者一兩。加紅花三錢。酒煎服。通經自愈。

四日兩頭瘡。用鳳眼草煮紅棗。飲汁自愈。俱傳信方。

婦女經閉不通。發熱勞症。鳳眼草爲末一兩。紅花炒二錢。水三鍾。煎一鍾。入黑糖五錢。空心服三五

劑。見血方止。醫學指南。

遺精白濁。鳳眼草炒乾。研末五錢。沖熱黃酒服。醫學指南。

花上細粉。入癬藥。殺蟲定癢。

風膏藥

桂海草木志。葉如冬青。粵志。肇慶七星巖產風藥。叢生石罅。其葉圓厚。和酒嚼之。治風疾。一曰風草。一曰風菜。諺云。風病須風菜。卽此。按福寧府志。風藤草。一名山膏藥。治風愈瘡。或卽此歟。

治太陽頭疼。目昏眩。

竹葉細辛

卽獐耳草。香勝細辛。

治脫力虛黃。汪氏方。

離情草

出雲南。夷中多有鬻之者。凡人爲情慾錮閉。往往致死。得此草一莖。煎服之。入口卽豁如夢覺。斷緣絕愛。亦不自知所以然也。按段成式雜俎。載左行草。使人無情。范陽以之入貢。或卽此類歟。又有合情草。與之相反。可知造物之生物。必有對待如此也。

已相思。絕情愛。如神。

和合草

此卽合情草也。柳崖外編。永昌府瀾滄江外。有和合草。根潔白。結男女交媾狀。土人見之。用稻米周遭圍之。掘方可得。否則遁去。有夫婦不諧者。服之卽歡好。然載諸江船。輒沈溺不得渡。智者用長線繫置岸側。持線登舟。渡畢然後引過。故滇省近邊一帶。時時有之。聞服之者曰。男視女。雖嫫母。西子王嬙。不若也。女視男。雖醜亦潘安。雖老亦健兒也。治夫婦相憎疾。煎酒服。

鹽蓬 蘇蓬

藥性考。二種皆產北直鹹地。土人割之。燒灰淋湯。煎熬得鹽。其葉似蒿圓長。至秋時。莖葉俱紅。燒灰煎鹽。勝海水煮者。

味鹹性涼。清熱消積。

知風草

藥性考。生雷瓊。蔓生。無毒。土人春日視其苗。有一節。則一次有風。入藥以無節者。浸酒用。治一切風痺。入骨。能拔之外出。

鳳頭蓮

出臺灣內山。形如黃連。色紫。多細鬚茸茸然。分岐如鳳頭。故名。

性平治咽喉一切諸症。

梨鬆果

如肥阜出臺灣。

治疔瘡磨塗。

蒲包草

活人書又名鬼蠟燭。新語云。水蠟燭。草本。生野塘閒。秋杪結實。宛與蠟燭相似。有詠者云。風搖無弄影。煤具不燃煙。以其開花結實。儼似蠟燭。故名。蘆葦蕩中頗多。土人採其實。以治金刃傷止血用。

治療癩。蒲包草連根採來。洗去泥。切寸段。砂鍋煎湯。代茶飲。不論男女皆愈。但婦人服此。愈後終不受孕。須服北京真益母丸四五兩。可解之。

汪連仕采藥書。蒲萼。即蒲草。南人呼莎草。北人呼板枝花。結實爲鬼蠟燭。其粉即蒲黃。

鬼扇草

采藥錄。鬼扇草。生石壁上。葉面青。有直紋。如白果葉狀。枝枝生如扇骨。人若打死在地。搗此草汁灌入。口卽甦醒。

鮎魚鬚

采藥錄。鮎魚鬚草。梗葉青色。面起直紋。葉葉有鬚二條。其根如竹鞭狀。

治疔瘡一切諸瘡。

汪連仕云。鮎魚鬚沿藤如豆。葉二丫。內生二鬚。根白而粗。專治外科一切疔瘡腫毒。罨之立消。

紫背稀奇

采藥錄。紫背生陰山。著地布苗。葉有兩大兩小。面灰色。有直紋。背微紫。若起心。有藤一二尺長。葉尖對生。

治痘毒。用活草一筋。作二服。酒煎下。已成速愈。未成立消。

雀麥

汪氏采藥書。卽雀角花。此花令人觸忿。花象雀腳。獵人采熬藥箭。呼爲破關草。人以其能爛痔漏。呼爲破管草。

性熱氣烈。傷人肌膚。立能潰腫。須米醋炒用。腐腸之品。不入湯劑。惟外治點痔漏用之。汪氏方。

拾遺卷四

草部中

金豆子夜關門附。

百草鏡一名金花豹子。三月生苗。十月枯。雖豆類。卻不起蔓。本高一二寸。分枝成叢。葉似槐而稍大。處暑時開黃花。五出磬口。蠟梅似之。結莢向上。類踈躑而短。長只二三寸。實似綠豆而扁。皮有紫斑。較綠豆稍大。味淡。

子。 治疔癰如神。

葉。 治腫毒。茅氏傳方。以葉曬研。醋和傅。留頭卽消。或酒下二三錢。

按傅澹菴草花訣。金豆子開黃花。子如綠豆。入滾茶。味清香。卽草決明。周憲王救荒本草。有山扁豆。卽苕苕。決明味甘滑。可作酒麴。俗呼獨占缸。苗葉花子皆可淪茹。及點茶食。所載形狀亦與金豆子同。而瀕湖綱目決明後附苕苕云。性平無毒。火灸作飲極香。除痰止渴。令人不睡。調中。隋稠禪師採作五色飲。以進煬帝者是也。無治疔腫之說。故並存以備考。

夜關門

葉如槐。夜卽合。開黃花。仁和寬橋人多種之。俞曉園云。有草木二種。草本者良。木本者乃合歡也。能追風。取皮治肺癰不斂。熬膏貼毒。生肌收口。

按綱目馬蹄決明。葉亦如槐。晝開夜合。其葉本小。末麥。秋開黃色花。或卽係決明。但綱目於決明子下。

亦不言疝氣今並存之。

莢。治疝氣。

接骨仙桃

一名奪命丹。活血丹。蟠桃草。生田野間。似醴腸草。結子如桃。熟則微紅。小如菘豆大。內有蟲者佳。百草鏡。仙桃草。近水處。田塍多有之。穀雨後生苗。葉光長。類旱蓮。高尺許。莖空。摘斷不黑。亦不香。立夏後開。細白花。亦類旱蓮而成穗。結實如豆大。如桃子中空。內有小蟲在內。生翅穴孔而出。採時須俟實將紅。蟲未出生。翅時收用。藥力方全。蓋此藥之用。全在蟲。須曬焙。令內蟲死。若掛懸風乾。恐內蟲生翅而出。藥亦無用矣。按此草須芒種後採。若過夏至。則蟲穴孔而出。化爲小蚊。苞空無用矣。性溫。味甘淡。消癰腫。跌打。或搗汁。或屑服。俱效。

治肝氣和胃。集聽云。一名八卦仙桃。此草生田野。葉如石榴葉。實如桃子。絕小。內生小蟲者真。取實連蟲用。○一方專治肝氣胃氣小腸疝症。用仙桃草有蟲者。金橘核。福橘核。華澄茄。各等分。爲末。砂糖調丸。菘豆大。每晚服一錢許。至重者二服斷根。

治勞損虛怯。百草鏡云。取有蟲仙桃草。用童便製透。入補藥用。

治吐血。百草鏡云。用新鮮接骨仙桃草搗汁。加入乳和服。按吐血諸方。皆用涼血之劑。惟此藥性熱。

加入乳能引血歸經。故妙。

跌撲損傷。救生苦海。用地蘇木五錢。八角金盤根一錢。接骨仙桃草五錢。臭梧桐花三錢。煎酒服。

七葉黃荊

一名豬臥草。地五爪。珠子草。烏食草。烏蛇草。七絃琴。亦名七葉黃荊藤。生土牆腳下陰地。葉尖長。相對三四行成一瓣。莖上起稜一凹。開紫色。白露後抽心。高三五尺。開細白花成簇。結子亦細碎。霜後紅如珊瑚細珠。根長而白。入藥。○百草鏡云。此種有木本者。名攓攓活。治跌撲癰腫。

味甘。生服能令人吐。

治勞力傷跌打。魚口漆瘡。煎湯洗。

治便毒。擣汁。將肥阜一個煨存性。調酒服。渣傳患處罨之。

治跌撲損傷。閃腰挫氣痛。集聽云。此祕方也。用烏蛇草曬乾爲末。砂糖酒調服。最凶者加重便。須端午日午時收者更效。若急用。不拘時日。取鮮者搗爛服。發汗愈。此草有五名。一曰烏蛇草。一曰烏龍草。一曰豬臥草。一曰七葉黃荊。因其葉七片一枝。或五片。大者九片。其根名千秋藤。九十月閒頂上結紅子。曬乾吞之。可治疝氣。

汪連仕草藥方。七葉黃荊。俗呼攓攓活。又名放棍行。又名珊瑚配。與烏蛇草別。行血敗毒。洗一切瘡。

疥鬼箭風。

山黃荊

玉環志。葉似楓而有杈。結黑子如胡椒而尖。可屑粉糝食。又有水荊。似藜。結黑子。不可食。翦其枝。可以接梨。入藥。用山荊。

消食下氣。

退管方。黃荊條所結之子。炙燥爲末。五錢一服。黑糖拌。空心陳酒送服。專治痔漏之管。服至管自退出。

九竅出血。救生苦海。黃荊有二種。赤者爲楷。青者爲荊。其木心方。其枝對出。一枝五葉。或七葉。葉如榆葉。長而尖。作鋸齒。五月時開花。紅紫色。成穗。子如胡荽子大。有白膜皮包裹。用其葉搗汁。酒和服。二合立止。

骨蒸勞熱。養素園驗方。六月雪。黃荊子。豨薟草。何首烏。當歸。川芎。熟地。白茯苓。水二鍾。薑三片。煎八分服。有痰加半夏。

漆瘡。姚希周經驗方。烏蛇草。不論鮮乾。一握。煎湯一洗即愈。
傷寒發熱而呃逆者。回春用黃荊子。不拘多少。炒。水煎服立止。

杖瘡起疔甲。黃荊子焙乾爲末。搽上卽開。不用刀刮。

肝胃痛。周山人方。用黃荊子研末和粉作團食。一二次斷根。

腳蛀。周氏方。用黃荊嫩腦葉搗爛罨上。卽愈。

救命王金不換。

一名死裏逃生。

治小兒感冒風寒欬嗽。大人傷力損傷吐血。諸風疼痛。無名腫毒。

金不換

亦名救命王。似羊蹄根。而葉圓短。本不甚高。此草出於西極。傳入中土。人家種之治病。故山澤中不產。立春後生。夏至後枯。用根。綱目三七亦名金不換。與此別。又木本亦有金不換。

汪連仕草藥方。金不換大葉者。爲金鉢孟大接骨草。細葉者。小接骨草。吐血頗效。因呼爲吐血草。軍中箭傷。罨之效。卽呼箭頭草。

性平。破瘀生新。治跌打消癰腫。止血愈疥癬。和糖醋搗擦。載蟲傷。用葉搗塗。治肺癰。

葉能伸臂力。開硬弓。臂痛或力弱不能弓者。取其葉揉軟覆膊上。以帛束之。過夜痛者卽定疼。且全力俱攝入臂上。開弓更不費力。營伍需爲要藥。

腫毒初起。百草鏡。金不換草。根葉不拘。搗碎五錢。陳酒煎服。

肺癰。百草鏡。金不換草。取根一兩。或葉七瓣。搗汁酒煎服。三次愈。不論口臭吐穢物者皆效。

風痛。楊氏驗方。金不換錢半。小活血。枳殼。蘇葉。當歸。各三錢。烏藥。川芎。各二錢。花粉五錢。老酒一斤。煎熱服。

跌打疼痛風氣。慈航活人書。救命王卽金不換。葉如冬菜葉。春夏用葉。冬用根。搗汁沖酒服。渣加毛腳蟹搗爛。傅如風氣。只用渣傅。

汪連仕方。行血破血。合地蘇木。落得打。共酒服。

黃麻葉

醫方集聽云。此治諸血之聖藥。一名牛泥茨。一名三珠草。一名天紫蘇。三月生苗如麻。葉有微毛。取葉嚼之。味如苦蘿。久嚼微辛。大葉旁兩小葉如杏葉。至八九月。每葉生子三粒。狀如粟米子。內一粒如菜子。嫩時青色。老卽黑色。取子入藥。治欬傷肺。開花細紫紅色。自五月起。至十月止。處處有之。治血症。集驗。取葉同虎杖龍芽用。血崩。集驗。用黃麻葉連根搗爛。酒煎露一宿。次早服之。

氣症心疼肚痛。痢疾痞結。

子。治欬傷肺。

汪連仕云大麻子卽黃麻子性熱行血醫人合麻藥共風茄用。

六月霜

丁未余館奉化邑人暑月俱以此代茶云消食運脾性寒解暑如神五月內山村人率刈乾束縛挑入城市售賣予以百錢買得一束如乾薄荷狀而長大倍之莖上綴白珠成穗土人云子能下氣消食更甚於枝葉偶得痞悶不快因取一枝沖湯代茶飲次日卽健啖異常所言信不妄也○三才藻異一名六月冷卽曲節草也性寒故名花似薄荷葉似劉寄奴名蛇藍解暑消積滯小兒暑月泡茶食之佳

性苦寒亦厚腸胃止痢開膈食之令人善啖凡傷寒時疫取一莖帶子者煎服之能起死回生屢試皆效又善解毒洗瘡疥皆愈

按綱目曲節草一名六月霜瀕湖所引圖經云甘平無毒治發背消癰拔毒同甘草作末米汁調服而他治有殊功並未言及今仍補之

山海螺

生山溪澗濱隕地上葉五瓣附莖而生根如狼毒皮有縐旋紋與海螺相似而生於山故名雖生溪畔性卻喜燥枝葉繁弱可以入盆玩○百草鏡云生山土二月採絕似狼毒惟皮疙瘩摺破有白漿爲異

其葉四瓣。枝梗蔓延。秋後結子如算盤珠。旁有四葉承之。

治腫毒瘰癧。取汁和酒服。渣傅患處。

汪連仕云。苗蔓生。根如蘿蔔。味多臭。治楊梅惡瘡神效。○王安采藥方。山海螺。一名白河車。加紫河車紅白石膏。名四聖散。治腸癰便毒。臟毒乳癰疽。皆效。

水楊柳

張琰種痘新書云。水楊柳乃草本。生溪澗水旁。葉如柳。其莖春時青。至夏末秋初則赤矣。條條直上。不分枝。極至秋略含赤花。凡痘焦紫乾枯者。以此洗之。立見光亮。漿水即行。其效如神。已洗之後。若往視之。則已洗未洗之處。其明潤焦暗。形色判然。取水行漿之效。孰有速於此者。但須用巾蘸其藥水。頻頻與拭。必水足而後已也。若秋冬葉落。取根用之。○瀕湖綱目木部有水楊。亦主痘毒。引魏直博愛心鑑浴痘法。但所載形狀。與此全別。惟於集解下註有赤楊。與張琰所說不甚相遠。而又無主治。故爲補之。性微寒。味缺。涼血解毒。痘瘡焦黑。浴之立起。

治跌打損傷。癩瘰痕疫。解暑鬱惡毒。

治痘。水楊柳湯。張琰治痘紅紫乾燥不起漿。有水楊柳湯。云古方所載。是木細葉紅梗。枝上有圓果。果有白鬚散出。此等俗呼水楊梅。以其果似楊梅也。余未試用。余常用者。乃是草生水邊。葉如柳葉。其

梗至秋則紅赤無果結。此草冬用枝梗及根。春夏秋用枝葉。凡痘紅紫乾枯不起水者。內服活血解毒之劑。外用此煎水拭頭面。連拭數次。立見光潤。卽具行漿之勢。所未洗者。其色不變。

手足拘攣。費建中救偏瑣言。用草本水楊柳酒煎服。甚驗。

痔漏洗方。傳信方。水楊柳根煎湯洗。俟蟲出愈。

膀胱落下。劉羽儀驗方。此名茄病。其色或紫者可治。白者不可治。黃連一錢。狗脊。水楊柳根。五倍子。魚腥草四味。多寡不拘。枯礬錢許。共爲末。煎湯先熏後洗。乘熱時輕輕托進。睡臥一二日卽愈。再服調理藥。

毛世洪經驗集。攪攪活。卽水楊柳。其根可治楊梅結毒。

小將軍

一名研星草。散血丹。生陰溼地。立春後。有苗葉類狗卵草。略大。莖微紅。穀雨後開花細小。細子二粒。如荷包草子。○百草鏡。二月發苗。葉如雙珠草。節間生子。如鵝不食草子。而略大。三月採。五月枯。

葛祖方。治黃疸腳氣。丹毒遊風。吐血。欬血。

百草鏡。治跌撲刀傷。癰腫。痰中帶血。洗疥瘡。

採藥志。性溫。敗毒。治杖傷。跌打損傷。擣汁酒和服。渣罨患處。立刻消腫而愈。

余居士選要方。治跌撲。用五靈脂三錢。麝香錢半。小將軍草三兩。鮮者取汁。先將酒煎上二味。待好去渣。再入藥汁滾一二沸。取服。

僧鑑平言。此草治疔腫如神。不論疔生何處。及何種疔。皆可用。此擣極爛。傅瘡口留頭。次日卽乾緊肉。上洗去再傅。至重者傅二次卽愈。輕者一塗卽好。真救疔垂死之聖藥也。親試神驗。

九鼎連環草

一名九葉雲頭艾。三月生苗。係子出高二三尺。葉似艾菊。香亦近之。霜後枯。產口外五臺山二處。近有人帶種。各處可植。八九月開。起穗結蕊。類野菊蕊。但不開花結實。其實如野菊花心。○百草鏡。春月發苗。葉類艾菊。香亦近之。八月時無花而實。實先起疙瘡。逐漸長大。內包十餘子。子細長小。葉乾之甚香。黃梅時。須不時焙曬。否則易黴。黴則無用。性溫。通行氣血。治風痺有效。

風痺。百草鏡。用九鼎連環草。乾者二兩。核桃肉三兩。搗爛。當歸一兩五錢。黃酒浸。隔水煮用。

牛筋草

一名千金草。夏初發苗。多生階砌道左。葉似韭而柔。六七月起莖。高尺許。開花三叉。其莖弱韌。拔之不易斷。最難芟除。故有牛筋之名。

根入藥。治脫力黃勞力傷。治瘰。取此草連根淨去泥。烏骨雌雞腹內蒸熟。去草食雞。良。○百草鏡。行血

長力入肝經。

按湖州府志南天燭亦名牛筋草又名烏飯草與此名同物異。

翠羽草

一名翠雲草孔雀花神錦花鶴翎草鳳尾草其草獨莖成瓣細葉攢簇葉上有翠斑○花鏡翠雲草無直梗宜倒懸及平鋪在地因其葉青綠蒼翠重重碎疊儼若翠鈿雲翹故名但有色而無花香非芸也其根遇土卽生見日則萎性最喜陰溼粵志孔雀花可以辟暑。

汪連仕采藥書翠雲草一名翠翎草卽矮腳鳳毛治痔漏同胡桃葉煎洗汪連仕方。

治吐血神效百草鏡女子吐血翠雲草三錢水煎服。

嘉慶癸亥予寓西溪吳氏家次子年十五忽腹背患起紅癩蔓延及腰如帶或云蛇纏瘡或云丹毒乃風火所結血凝滯而成予疑其入山樵採染蟲毒乃以蟾酥犀黃錠塗之不效二三日癩愈大作膿復與以如意金黃散傅之亦不效次日瘡旁復起紅暈更爲闊大有老嫗教以用開屏鳳毛卽翠雲草也搗汁塗上一夕立消此草解火毒如此又不特治血神效也。

半嬌紅

一名老鸛紅水雞冠立夏後生苗一莖直上莖紅葉尖長而狹八月結實六角五月采。

治風痺跌撲。煮羊肝食。退目中紅障。

普賢線

山川典產。峨嵋山。乃樹上苔鬚蔓引而成。長數尺。或言深谷有尋丈者。湖湘故事。載羅漢條。卽此。唐駕湖曰普賢線。產峨嵋山。乃普賢石上青苔也。山僧採取曬乾。以爲上藥。○益部方物記。仙人縉生大山中。與苔同種。但巖陰石隈多鮮翠。長二三尺。叢垂若縉。○敏按西陽雜俎。仙人條出衡岳。無根蒂。生石上。狀如同心帶。三股色綠。亦不常有。條卽縉也。此生石上者方入藥。無疑。

治胃脘心氣疼痛。煎服。瀕死者皆效。

藏紅花 土紅花

出西藏。形如菊。乾之可治諸痞。試驗之法。將一朵入滾水內。色如血。又入色亦然。可沖四次者真。綱目有番紅花。又大薊曰野紅花。皆與此別。

治各種痞結。每服一朵。沖湯下。忌食油葷鹽。宜食淡粥。

治吐血。王士瑤云。不論虛實。何經所吐之血。只須用藏紅花。將無灰酒一盞。花一朵。入酒內。隔湯頓出。汁服之。入口血卽止。屢試皆效。

土紅花

福建續志。土紅花大者高七八尺。葉如枇杷而小。無毛。秋生白花如粟米粒。生福州及南恩州山野中。福州生者作細藤。似芙蓉。上青下白。根如葛頭。入藥薄切。用米泔浸一宿。更用清水浸一宿。搗服。

阿勃參

程賦統會云。產拂菻國。華夷花木考。阿勃參出拂菻國。長一丈餘。皮色青白。葉細。兩兩相對。花似蔓菁。正黃。子似胡椒。赤色。斫其枝。汁如油。其油極貴。價重千金。

油塗疥癬即愈。

茄連

延綏鎮志。葉如藍草而肥厚。種之畦。根圓大類葵。露出土外。開黃花。京師謂之撒藍。

能解煤毒。

靈通草

楚庭稗珠。僧建公之徒參悟患聾。達公謂得羅浮靈通草始瘳。參悟來博館。入山於玉女峯。得此草。莖長三尺。如箸而莖虛中。兩頭皆實。頂開七葉。取葉煎水服。截其虛者。貫兩耳中。夜一聲若雷。聾遂開。

治聾。

羅裙帶

職方典。出廣西南寧府。葉滑嫩。長二寸許。似帶。

治折傷損手足者。取葉火煨微熱。貼之即愈。

金狗脊

職方典。出粵南寧府。卽蕨。根形如狗脊。毛如狗毛。有黃黑之別。

止諸瘡血出。治頑癬。黑色者殺蟲更效。

雪裏開 雪裏花

雁山志。性大寒。深谷中有之。能解砒毒。冬時開花。故名。

治喉瘡熱毒。萬氏家抄。取根擣汁服。

雪裏花

朱楚良在鎮海。其土人有采雪裏花者。冬月嚴寒。此花始生。在招寶山龍潭旁。環渚而發。苗甚短小。如六月雪狀。高不過二寸許。每雪時開白花如豆大。土人采得。乾之入藥。傳痔。以雪裏花爲末。溼者乾。乾者麻油調搽一二度。其痔卽消縮。

苦草

綱目。水草類。載苦草云。生湖澤中。長二三尺。狀如茅蒲之類。主治白帶。又主好嗜乾茶面黃二種病。其

氣味藥性又失載。今依張璠玉本經逢原補之。苦溫無毒。香竄入足厥陰肝經。理氣中之血。產後煎服。能逐惡露。但味苦伐胃。氣竄傷腦。膏梁柔脆者服之。減食作瀉。過服則晚年多患頭風。昔人畏多產育。以苗子三錢。經行後麴淋酒服。則不受妊。傷血之性可知。

山馬蘭

甌江志。別名一枝香。按綱目馬蘭下集解註云。又有山蘭生山側。似劉寄奴。葉無極。不對生。花心微黃。赤。大補血。而不言其有治痰開塞之功。○百草鏡。山馬蘭治疔極效。故又名疔見怕。其蔓延到處節上生根。故又名鬼仙橋。皆俗見隨義而呼也。

治風痰喉閉。驚風。傳疔。定痛。搗汁塗小兒蛇瘡。煎湯洗痔。腫疥癢。百草鏡。

風痰喉閉。永嘉縣志。山馬蘭取根搗碎。用人乳浸。男病用哺女。婦人乳。女病用哺男。婦人乳。浸少頃。令病人仰臥。椽上將頭倒垂。將乳汁男左女右滴入鼻中。候喉中有痰涎壅塞。即轉身垂頭開口。任痰自流。痰完病愈。但此藥入鼻後。病人不許有聲。一作痰即止。

小兒驚風。牙關緊閉。煎汁灌入喉中。即愈。

鎖喉風。頭面頸項俱腫。飲食不下。傳信方。白馬蘭搗爛。井花水取濃汁。白酒漿均調。下喉立效。

小兒頸項腿肋縫中潰爛。養生經驗方。以馬蘭汁調六一散搽之。即愈。○馬蘭搗爲膏。能治大人兩

腿赤腫流火。或溼熱伏於經絡。皮面上不紅不腫。其疼異常。病人只叫腿熱。他人按之極冷。此謂伏氣之病。用此膏搽之。立愈。

流注。顧錦州傳方。采山馬蘭。煮熟。麻油醬油作蔬拌食。半月自消。

野馬蘭

百草鏡云。馬蘭氣香可作蔬。此種係野生者。其氣臭不可食。三月發苗。莖赤。而初秋開白花。成簇細碎。三月采。因其功能涼血。與馬蘭同。故名。莖葉根俱入藥。

性寒涼血。治溼熱。蛇咬。小兒癩瘡。

獨腳馬蘭

李氏草秘。此草生河澤邊。葉如柳。對葉圓梗。

治發背諸腫毒熱癰。搗汁一杯。入酒二杯服之。未成膿者即消。有膿者即出。重極者服半盃或一盃。再劑渣卷。

玉淨瓶

俗名豬屎草。氣殺郎中。白山桃。春月發苗。葉尖長。排生。莖有白紋斑點。高數尺。葉對節生。夏開細白花。成簇如華蓋。結實如萊菔子。大青圓。霜降後紅。其根肥白。十月采。入藥。

味甘性平。和血行血有效。治勞傷跌撲。

汪連仕草藥方。氣殺郎中草。一名青背仙禽。又名疔見怕。山人呼疔頭草。其性清涼降火。消癰毒。散腫。拔疔根。

紗帽翅

臺海采風圖。此草一莖數十。花色黃。入藥用葉。

治癰

石風丹

生石上。能療瘡毒。出雲南蒙化府。

象鼻草

職方考。出雲南府。

治丹毒跌撲損傷。

透骨草

珍異藥品云。形如牛膝。綱目有名未用下。附透骨草。亦未詳其形狀。據其所引治病諸用。乃鳳仙草也。蓋鳳仙亦有透骨草之名。與此迥別。

療熱毒良。珍異藥品。

治風氣疼痛。不拘遠年近日。家寶方。透骨草二兩。穿山甲二兩。防風二兩。當歸三兩。白蒺藜四兩。白芍三兩。豨薟四兩。去莖用葉。九蒸九曬。海風藤二兩。生地四兩。廣皮一兩。甘草一兩。以上爲末。用豬板油一斤。煉蜜爲丸。梧子大。早晚各五錢。酒下。

腿疼難忍。醫學指南。核桃肉四個。酸蒲萄七個。斑蝥一個。鐵線透骨草三錢。水煎熱服。出汗愈。不問風溼皆效。

治痞。醫學指南。透骨草一味。貼患處。一炷香。或半炷香時。卽揭去。皮上起泡卽愈。

洗癰瘻秘方。醫學指南。蛤蚧一個。麻黃。川椒。透骨草。防風。大鹽。各四兩。白花蛇二錢。艾一把。槐枝一條。川烏草烏各二兩。紫花地丁一斤。用水二桶煎。大缸半埋在地。入水溫時。坐上洗。再用水二桶煎。渣候冷時。再入熱水。或一日。或一夜。臨出時。用水澆頂心數次。再用芥末稀貼患處。紙絹裹熱。坑上睡汗出盡爲度。忌早起飲食。就臥內妙。

汪連仕采藥書。透骨草。彷彿馬鞭之形。大能軟堅。取汁浸龜板。能化爲水。合金瘡。入骨補髓。兼治難產。專主煉膏丹。按鳳仙白花者。亦名透骨白。追風散氣。紅花者名透骨紅。破血墮胎。亦有透骨之名。非一物也。

不死草

珍異藥品出柳州高一二尺狀如茅。

食之延年暑時置盤中食物不腐并可辟蠅。

拳黃雞子

珍異藥品一名水蘿蔔。

治霍亂吐瀉瘡疾每用一錢嚼碎水飲下。

雞腳草

汪連仕采藥書卽雞爪花其子名勝光子。

去星翳明目清肝。

根行血治風治大麻瘋鶴膝瘋雞爪風。

刀鎗草

粵西叢載此草細葉黃花。

止金瘡血。

苦地膽

出粵西。

葉可貼熱毒瘡。

箭頭風

粵西叢載。花似箭頭。職方典。產廣西南寧府山中。花如箭鏃。

治風四肢骨節痛。煎水薰洗之愈。

消痰。治氣急。定喘妙方。王登南方。取箭風草。放鮮肉內煨熟。要淡。忌用鹽醬。取出。去草食肉。

紅果草

叢載云。有二種。果大者。葉略尖。不入藥用。又有果如小指頭頂者。葉圓邊花。梗有軟刺。入藥用。

治牙痛酒刺。

龍柏藥性考。紅果草出廣西。葉圓刺弱。味辛。煎湯漱牙疼。

勾金皮

珍異藥品云。形未詳。

治無名腫毒惡毒。醋磨塗上。卽消。牙疼。以皮塞牙縫中。卽定。咽喉乳蛾。每用三五釐。細嚼嚥下。

琉璃草

出始興玲瓏巖。莖如芹梗。與肇慶風藥相類。食之治風。

仙人凍

一名涼粉草。出廣中。莖葉秀麗。香猶藿檀。以汁和米粉食之。止飢。山人種之。連畝。當暑售之。○職方典。

仙人草。莖葉秀麗。香似檀藿。夏取其汁和羹。其堅成冰。出惠州府。療飢澤顏。

金絲草

出陝西慶陽。

性涼味苦。能去瘴。解諸藥之毒。

紅珠大鋸草

治腹脹黃疸。王安卿采藥志。大鋸草敗毒消腫。清火。

金剛草

治肺癰痔漏疔腫。

臺七里

臺灣志。卽七里香。出臺地者。能辟煙瘴。所種之地。蚊蚋不生。

辟瘴。焚其煙。化蚊蚋爲水。

番薏茹

采風圖。一名番苦荅。一名心痛草。種出荷蘭。葉秀嫩似雲板。曬乾則香。結子青紅色。治一切心氣痛。

馬尾絲

臺志略。此草葉細而長。花紅而小。根如荔子核。黃色。多細絲如髮。不拘鮮乾。皆可用。治蛇蜂諸毒。

方正草

福建續志。出永春州。葉狹而長。藍色。平分四方。攢莖而上。其實六瓣。

治金蠶蠱

七仙草

三才藻異。葉尖細長。

治杖瘡

大母藥

藍布裙
四川通志出雪山石塊上有雌雄二種出必雙出補元氣益髓脈功同人淺

四川通志草本出松潘衛

治腳氣壯筋骨

露筋草

藻異生施州高三尺春苗卽花子碧色不彫

治蜘蛛傷瘡

百里奚草

藻異名殺羊齒產陰地如秋海棠

味酸治牙疼

黃德祖

藻異德祖卽石公號此草生圯上故名葉如尖刀獨梗芋花紅白頭如何首烏

治瘡癬

斑節相思

諸羅志枝葉類薄荷而大味似艾。
性能解毒。

野丈人

藻異。葉似芍藥。花類木槿。白毛寸餘披下。如白頭翁。
去腸垢。消積滯。

戴文玉

藻異。戴文玉。草名。如金釵草。黃色。
療血疾。

金果欖

出廣中。百草鏡云。出廣西。性寒。皮有疙瘩。味苦色黃。陳廷慶云。內肉白者良。但有二種。一種味甚苦。一種味微苦。入藥以味苦者良。

性涼解毒。百草鏡云。凡腫毒初起。好醋磨傅。露出患頭。初起者消。已成者潰。咽喉一切症。煎服一二錢。即效。如喉中疼爛。用三錢爲末。加冰片一分吹之。

藥性考。金果欖產廣西。生於藤根。堅實而重大者良。藤亦可用。味苦。性大寒。解毒。咽喉急痹。口爛目痛。

耳脹熱。嗽嵐瘴吐衄。俱可磨服。疽癰發背。焮赤疔瘵。蛇蠍蟲傷。俱可磨塗。

柑園小識。金苦欖種出交趾。近產於廣西蒼梧藤邑。蔓生土中。結實如橄欖。皮似白朮。剖之色微黃。味苦。土人每鑿山穿石。或深丈許取之。先君嘗覓得二十枚。愈數百人。而疔喉等症。有起死回生之功。當廣傳之。以補本草之缺。

性寒味苦。能祛內外結熱。遍身惡毒。消瘴癘。雙單蛾及齒痛。切薄片含之。極神效。磨塗疔瘡腫毒。立消。

柑園小識。

雁來紅

一名老少年。無有用入藥者。惟急救方有治腦漏法。用老少年煎湯熱薰鼻內。然後將湯服二三口。妙。冬閒用根。瀕湖綱目青葙下。附雁來紅。亦無主治。土宿真君本草。雁來紅制汞。

膏子眼藥。去遠年星障。○眼科要覽。老少年銀杏剖殼爲君。官渣根大葉者佳。千里光。雄揚梅樹根皮。爲臣。煎成濃膏。量加製甘石冰片。又方加茶樹根皮。

花鏡。老少年其苗初出似莧。莖葉穗子。與雞冠無異。至深秋本高六七尺。則腳葉深紫。而頂葉大紅。鮮麗可愛。愈久愈妍如花。秋色之最佳者。又有一種少年老。則頂黃紅而腳葉綠。爲別一種。枝頭亂葉叢生。有紅紫黃綠相兼雜出者。名十樣錦。一種根下葉綠。頂上葉純黃者。名雁來黃。

天燈籠草

一名山胡椒。形似辣椒而葉大。本高尺許。開花白色。結子如荔枝。外空。內有綠子。經霜乃紅。京師呼爲紅姑娘。○按此草主治雖夥。惟咽喉是其專治。用之功最捷。綱目主治下失載。故補之。
性寒。治咽喉腫如神。

汪連仕采藥書。金燈籠。園人稱爲天燈籠。種盆爲景。更稱爲珊瑚架。

性能清火。消鬱結。治疝神效。傳一切瘡腫。專治鎖纏喉風。治金瘡腫毒。止血崩。酒煎服。又以反手取根七株。去梗葉洗淨。連鬚切碎。酒二盃。煮鴨蛋二枚。同酒吃。治瘡如神。
子。入藥。保毒不大。王安采藥方。

見腫消

一名土三七。乳香草。越人曰爛草。初生苗葉面青背紫。葉似羊角菜多歧。秋開小黃花如菊。垂絲可愛。根似芋魁。人家多種之。○按綱目有見腫消。云其葉似桑。治癰腫狗咬。當別是一種。○採藥錄見腫消。生溪澗中。葉有三角。枝梗皆青。根亦青色。形如菖蒲。根性涼。治諸瘡毒。行周身活血。追風散氣。此又一種。名同物異。

草寶云。治跌打損傷。消腫散瘀要藥。百草鏡云。治乳癰腫毒。金瘡止血。杖丹棒瘡。喉癰雙蛾。效嗽。急

慢驚風。延綠堂方。土三七春夏用葉。秋冬用根。搗汁一鍾。用水酒漿和勻灌入。自效。
楊癩毛入肉作痛。秘方集驗。土三七亦名金不換。用其葉搗爛立塗。卽止。

千年老鼠屎

紫背天葵根也。百草鏡云。二月發苗。葉如三角酸。向陰者紫背爲佳。其根如鼠屎。外黑內白。三月開花。細白。結角亦細。四月枯。按東璧綱目。菟葵下注云。卽紫背天葵。於主治只言其苗。不及其根之用。今爲補之。出金華諸暨深山石罅間者。根大而佳。春生夏枯。秋冬罕有。

性涼清熱。治癰疽腫毒。疔瘡癰疔。跌撲瘋犬傷。七種疝氣。痔瘡勞傷。百草鏡。

癰疔傳藥。醫宗彙編。用紫背天葵子。每歲用一粒。同鮑魚搗爛。傅之立消。

瘰癧。救生苦海。用千年老鼠屎搗碎。同好酒入瓶。煮一炷香。隔三日。隨意飲醉。蓋被取汗。數次自效。
○黃賓江傳天葵丸。專治瘰癧。紫背天葵一兩五錢。海藻。海帶。昆布。貝母。桔梗。各一兩。海螵蛸五錢。共爲細末。酒糊丸。如梧桐子大。每服七十九。食後溫酒下。此方用桔梗開提諸氣。貝母消毒化痰。海藻昆布以軟堅核。治瘰癧之聖藥也。

諸疝初起。經驗集。凡疝初起。必發寒熱疼痛。欲成囊癰者。用荔枝核十四枚。小茴香二錢。紫背天葵四兩。蒸白酒二罈。頻服卽愈。

辟瘟草 魚鼈金星 鳳尾金星

一名獨腳金雞。又名鴨腳金星。佩帶之可辟疫氣。近見市者有小葉而短狹。大葉而長狹者。皆非辟瘟草也。小者名七星草。俗呼骨牌草。惟無五六。蓋五六乃天地之中。不易結。寄生石樹間。大者名劍脊金星。長一二尺。生山溪澗旁。老則葉背皆起星。此二種。東璧綱目已收載。辟瘟草葉如鴨腳。有三歧。一莖一葉。氣味清香。老則有星。香氣亦減。○百草鏡云。鴨腳金星。卽辟瘟草。葉如鴨腳。大而薄。背生星點。至八九月開。星老乃黃。乾之。其氣香冽不變。若葉太老及經水者。便不香。端午采嫩者。陰乾用。勿見火。性平。味苦。氣香。治傷寒瘡痢。風氣腫毒。時氣惡氣。散邪風。乳癰熱瘡。小兒痘眼疔。喉閉生蛾。同金鎖匙汁醋漱。痧脹。香竄疎經絡。治疔。

百草鏡。治痧脹。用鴨腳金星草。曬乾爲末。取少許。嚙鼻中。或煎服亦可。
小泉驗方。疔腫。用鴨腳金星草煎酒。一服卽消。

魚鼈金星

生背陰山石上。立夏後發苗。根細如織線。蔓延石上。葉不對節。一長一圓。長者爲魚。圓者爲鼈。魚葉經霜則老。背起金星。惟鼈葉無。亦生西湖飛來峯絕頂。

治臙脹。癩癧。火毒症。採藥志云。性涼。治痰火毒行上部。採藥方。消痞塊。痰核。疔腮。

鳳尾金星

永師方治煙筒戳傷喉用魚鼈金星草煎濃湯咽喉中傷立止疼而愈永師方一作永寧傳方
根類竹根黃色有鬚葉類建蕙而短長不滿尺春月發苗背有點子兩行相對有數十粒極密秋霜後乃黃生石山下其根蔓生○百草鏡金星鳳尾其葉細碎形似鳳尾三月發苗葉背有星作細白點子秋後乃黃生古牆石壟中背日者佳惟實熱症可用

性涼治吐血咽喉火毒諸丹毒發背癰痺 百草鏡癰疽非陽毒及非金石藥毒者戒用謝雲溪云性太涼男女忌服雖取效一時但精血受寒不能生育爲虞耳○寧德縣志白腳者治痢○家寶方治喉癰金星鳳尾草搗汁加米醋數匙和勻用竹筴裹新棉花蘸汁點患處稠痰隨筴而出亦治喉風
水茸角

華陀中藏經狀如鬼腰帶竹小窠子生三四月開黃花葉如百合六七月採兩浙呼爲合萌
治吹爛 水茸角不拘多少新瓦上煨乾爲末臨臥酒調服二錢次日即愈已破者略出黃水亦效
老鴉蒜

一名銀鎖匙一名石蒜一枝箭百草鏡云石蒜春初發苗葉似蒜又與山茨菰葉相似背有劍脊四散布地七月苗枯中心抽莖如箭幹高尺許莖端開花四五成簇六出紅如山丹根如蒜色紫赤肉白有

小毒。理喉科。綱目主治失載。○金士彩云。此吐藥也。且令人瀉。

治喉風痰核。白火丹。肺癰。煎酒服。

對口初起。家寶方。用老鴉蒜搗爛。隔紙貼之。乾則頻換。其毒自消。

雙單蛾。神醫十全鏡。老鴉蒜搗汁。生白酒調服。嘔吐而愈。

洗痔漏。沈惠如傳方。老鴉蒜。鬼蓮蓬搗碎。不拘多少。好酒煎置瓶內。先熏。待半日湯溫。傾出洗之。三

次全愈。

痰火氣急。王都官方。蟬螂花。根卽老鴉蒜。洗焙乾爲末。糖調酒下一錢。

玉如意 四方如意草。

一名箭頭草。剪刀草。大風草。百草鏡云。生山閒或田塍。有紫白二種。紫花者名金剪刀。白花者名銀剪刀。入藥白花者良。葉與人家盆栽者無異。但花小。葉狹長而尖。微有別耳。○敏按山野閒如意草。葉上尖下圓。深青色。與人家所種無異。惟葉色稍深綠耳。其花亦有紫白二種。至狹長之葉者。乃地丁草。所謂銀剪刀。白花者是也。金剪刀。紫花者是也。與如意草一類二種。其性情功效。亦不甚遠。

葛祖方。治痞塊瘡毒。追風理氣。逐疫肺癰。

乳癰初起。百草鏡。用玉如意草一兩。白酒煎。飽肚時服。初起者二服卽消。成膿者兩劑必潰。已潰者

三服易斂。疼痛者服之能止。

乳癰疔瘡。救生苦海。白花如意草。一名銀剪刀。生田野山閒。較人家種者葉狹花小。搗汁服之。渣傳患處。

兒背生泡。集驗。小兒背上起白泡。纍如綴珠。一二日即破。膿血外流。癢甚。一處方好。一處又起。用如意草搗爛傅之。長巾縛定。一夜而愈。

腳上生瘡。集驗。治腳上生瘡。亂孔如蜂窩者。用如意草搗爛傅之。或用乾如意草爲末。雞子清調傅亦可。

按此種又與地丁草不同。地丁小而此種大。地丁葉深綠。此葉淺綠。有云家種如意草。亦有白花者。乃真玉如意。野生者。仍是銀剪刀耳。性劣。不若家種者良。

痘兒氣急。劉氏驗方。白花地丁。不拘多少。煎湯服之。立止。

炎天火痘。劉氏驗方。暑月出痘。有一種火痘。遍身皆紅者是也。用白花地丁搗汁。白酒沖服。立解。

四方如意草

汪連仕草藥方。其葉四處分開。一名地靈芝。乃瑞草。四方開花。莖多葉繁。如如意。

治神鬼二箭。活血追風。

水楊梅

一名金勾葉。家母利。藤勾子。此草結紅子如楊梅。小兒采食之。綱目有水楊梅。云其實類椒。乃地椒。是別一種。

葉點牙疼。取葉搗汁點眼角。飲香茶一鍾。閉目少頃。牙疼卽止。

野靛青

一名鴨青。處處有之。如莧菜。葉尖中心有青暈。

治結熱黃疸。定瘡毒疼痛。生肌長肉。

困來草

劉羽儀經驗方。此草又名水灌頭。子如桑子。但桑子長而此子圓。又如茶紙子。但茶紙子紅而此子綠。又不可不辨。

治黃疸。用困來草。石茺葵。卽鷓兒不食草。二味洗淨。搗汁。沖陳酒一大鍾服之。四五次自愈。

走馬胎

出粵東龍門縣南困山中。屬廟子角巡司所轄。山大數百里。多低槽。深峻巖穴。皆藏虎豹。藥產虎穴。形如柴根。乾者內白。嗅之清香。研之膩細如粉。噴座幽香。頗甜淨襲人。

研粉傅癰疽。長肌化毒。收口如神。

蒼耳子油

物理小識。出山東。

治瘋。

飛鸞草

秋景竄雜記。飛鸞草。生錢塘葛嶺後山金鼓洞。洞在道士庵福之右。涉泉入洞。暗處仰見一線天光。中見有此草。形如飛鸞。有頭有翅。有三尾。雪中開五色花。中抽一莖。直上着花。葉狀如金絲荷葉。草面綠而背銀紅色。光者可治病。有黑毛而不開花者。乃斷腸草。能殺人。不可誤采也。故須雪中見花者爲真。根如老薑。入藥用葉。

性上升。味苦寒。治咽喉及口內諸病。取葉七片。滾水沖服。立愈。此草味雖苦寒。性反不下降。而獨上升。用指蘸之。則苦寒全在指上。其水即淡。若沾唇。則味在唇上。水雖咽下。而味不入喉也。故治咽喉者。須以小管灌於喉中。或令病人張大口。用匙灌入。直達喉所。則味在患處矣。金鼓洞左近背陰地。亦有之。

青煙白鶴草

汪連仕云。草生海島。其性最行氣。味甚猛烈。色綠如翠。能入氣分血分。消積氣。散鬱血。續筋骨。土人以煎膏療病。治內外一切症。其汁卽阿魏。近日方士於後營打枝巷葉家園取樹脂。僞充射利。又有以秦

皮代充者。眞者亦稀見矣。

拾遺卷五

草部下

浙貝土貝

今名象貝。去心炒。百草鏡云。浙貝出象山。俗呼象貝母。皮糙味苦。獨顆無瓣。頂圓心斜。入藥選圓白而小者佳。○葉闇齋云。寧波象山所出貝母。亦分兩瓣。味苦而不甜。其頂平而不尖。不能如川貝之象。荷花蕊也。土人於象貝中揀出一二與川貝形似者。以水浸去苦味。曬乾。充川貝賣。但川貝與象貝性各不同。象貝苦寒。解毒利痰。開宣肺氣。凡肺家挾風火有痰者宜此。川貝味甘而補肺。不若用象貝治風火痰嗽爲佳。若虛寒咳嗽。以川貝爲宜。

張景岳云。味大苦。性寒。陰也。降也。乃手太陰少陽足陽明厥陰之藥。大治肺癰肺痿。欬喘。吐血衄血。最降痰氣。善開鬱結。止疼痛。消脹滿。清肝火。明耳目。除時氣。煩熱。黃疸。淋閉。便血。溺血。解熱毒。殺諸蟲。及療喉痺。癩癧。乳癰。發背。一切癰瘍。腫毒。溼熱。惡瘡。痔漏。金瘡。出血。火瘡。疼痛。爲末可敷。煎湯可服。性味俱厚。較之川貝。母清降之功。不啻數倍。反烏頭。又解上焦肺胃之火。

張石頑本經逢原云。貝母浙產者。治疝瘕喉痹乳癰。金瘡風痙。一切癰瘍。同苦參當歸。治妊娠小便難。同青黛。治人面惡瘡。同連翹。治項上結核。皆取其開鬱散結化痰解毒之功也。

吹喉散。經驗廣集。治咽喉十八症俱效。大黑棗每個去核。裝入五倍子一個去蟲研。象貝一個去心。研。用泥裹煨存性。共研極細末。加薄荷葉末少許。冰片少許。貯磁瓶內。臨用吹患處。任其嘔出痰涎。數次即愈。

對口。楊春涯驗方。象貝母研末敷之。神效。

土貝母

一名大貝母。百草鏡云。土貝形大如錢。獨瓣不分。與川產迥別。各處皆產。有出安徽六安之安山者。有出江南宜興之章注者。有出寧國府之孫家埠者。浙江惟寧波鄞縣之樟村及象山有之。入藥選白大而燥皮細者良。

百草鏡云。味苦性平。微寒無毒。能散癰毒。化膿行滯。解廣瘡結毒。除風溼。利痰。傅惡瘡。斂瘡口。茅昆來筆記。味大苦。專消癰疽毒痰。楊梅結毒。非此不除。

乳癰初起。白芷。土貝母。各等分。爲細末。每服三錢。陳酒熱服。護暖取汗。即消。重者再一服。如壯實者。每服五錢。○楊春涯驗方。天花粉。乳香。去油。沒藥。白芷。歸尾。土貝母。赤芍。獨活。川芎。各一錢。甘草節。陳

皮各八分。穿山甲三片。阜角刺一錢五分。金銀花二錢五分。防風一錢二分。好酒煎服。○又方。白芷梢。土貝母。天花粉。各三錢。乳香去油一錢五分。共炒研末。白酒漿調搽。再用酒漿調服三錢。乳癰。外科全生。紫河車草。浙貝。各三錢。用黃糖拌勻。好酒和服。盡醉。蓋被取汗。趙貢栽云。浙貝乃寧波土貝母也。

治乳岩。葉氏驗方。陽和湯加土貝母五錢煎服。數日可消。○姚希周濟世經驗方。治乳岩已破。用大貝母。核桃。金銀花。連翹。各三錢。酒水煎服。

癰疽。不論已破未破。皆治。瑞安生驗方。土貝母半筋。牛皮膠四兩。敲碎。牡蠣粉炒成珠。去粉爲細末。水發丸。菉豆大。每日早晚用紫背天葵根三錢。或用海藻昆布各錢半煎湯吞丸三錢。○又癰疽膏藥。用牛皮膠水熬化一兩。入土貝母末五錢。攤油紙上貼之。○吉雲旅抄。紫背天葵一兩五錢。土貝母。昆布。海藻。各一兩。西牛黃三分。海螵蛸五錢。陳膽星三錢。桔梗一兩。共爲細末。酒發爲丸。如菉豆大。每日服六七十九。好酒送下。○千金不易方。治男婦小兒生癰疽。內消。用土貝母研末。陳米醋調搽。數日即消。○仙姑玉環散。治痰核癰疽未潰。用此方。生南星。生半夏。土貝。各等分。研末。醋蜜調勻敷。癰疽初起。土貝研細。陳米醋和搽。數日暗消。○又方。土貝母。大力子。全蟲洗。各五錢。紫背天葵根。昆布洗。海藻洗。各一兩。青皮。蟬退。各三錢。甲片炒四錢。蜈蚣酒炙七條。當歸二兩。爲末。蜜丸。砂仁湯下三

錢。虛加人參。○種福堂敷痰核癩癧方。用生南星。生半夏。生大黃。各一兩。大貝母。昆布。海藻。海浮石。銅綠。明礬。各五錢。用商陸根汁。葱汁。薑汁。蜜。四味調敷。○又痰核癩癧膏。中用大貝母。

痰核方。人參。甘草。各六分。川芎。桔梗。陳皮。木香。烏梅。各八分。當歸。白芷。防風。茯苓。各一錢。半夏五分。生薑三片。黑棗二個。水二鍾。煎服。如患處有水不乾。加知母一錢。土貝母一錢。

消癩癧。傳信方。穿山甲和沙炒。牛皮膠切碎。麥殼炒。各二兩。土貝母。連翹。各一兩。共爲末。大人三錢。小兒二錢。

治汗斑。集驗。土貝母一兩。南礪砂一兩。冰片一分。共研末。搽之即愈。家寶方。礪砂只用五錢。以暑月出汗時。類擦乃效。

治鼠瘡。彙集。關紹聖方。大鯽魚一尾。阜角內獨子。每歲一個。川貝母三錢。土貝母二錢。將阜角子貝母入魚肚內。黃泥包裹。陰陽瓦炭火焙乾。存性。研爲細末。每服三錢。食後黃酒調服。忌葷百日。

手發背。慈惠編。生甘草。炙甘草。各五錢。阜刺二錢五分。土炒土貝五錢五分。半夏一錢五分。甲片二錢五分。炒黑。知母二錢五分。加葱薑水酒煎二劑服。即愈。

刀割斧砍。夾翦鎗箭傷損。集驗云。土貝母末敷之。止血收口。

毒蛇咬。祝氏效方。急飲麻油一盃。免毒攻心。再用土貝母四五錢。爲末。熱酒沖服。再飲酒盡醉。安臥少時。藥力到處。酒化爲水。從傷口噴出。候水盡。將盃內貝母渣敷傷口。垂死者皆活。

腫毒初起。百草鏡云。此方傳自異人。應驗如響。重者不過三服。輕者一二服。初起卽散。已成者自潰。且易收口。甲片炙搗六錢。全當歸五錢。花粉八錢。白芷五錢。廣皮三錢。土貝母研二錢。銀花一兩。阜刺三錢。赤芍六錢。防風五錢。甘草節六錢。乳香炙另研一錢。沒藥炙另研一錢。蘇木二錢。川牛膝一錢。川斷五錢。酒水各半煎汁去渣。將沒藥乳香末調服取汗。忌雞犬孝服男女僧尼觸犯。須避靜室服藥。趙貢栽云。此方專於攻散。藥力太重。惟可施於壯實之人。虛弱者勿服。

按貝母有甜苦之分。有川象之別。百草鏡云。出川者曰川貝。出象山者名象貝。絕大者名土貝。川產者味甘。間有微苦。總不似他產之一味苦而不甘者也。入藥能補氣利痰而不寒。虛人宜之。象貝一味苦寒。能化堅痰。性利可知。若土貝功專化膿。解癰毒。性燥而不潤。以象貝皆小。土貝獨大。於川產者亦異。綱目不分著功用。或其時尚未有此種耳。又用藥識微云。川貝中一種出巴東者。獨大。番人名紫草貝。母大不道地。出陝西者名西貝。又號大貝。張石頑云。貝母川產味甘。最佳。西產味薄。次之。象山者微苦。又次之。一種大而苦者。僅能解毒。並去心用。今川中亦產一種大如錢者。土人以之搗粉作漿。刷川綱用。不知入藥。然則土貝川中亦產。不特浙江也。憶庚子春有友自川中歸。貽予貝母。大如錢。皮細白而帶黃斑。味甘。云此種出龍安。乃川貝中第一。不可多得。信是。則川中之甜貝母亦有大者。不特金川子獨甜也。並附以俟考。

草棉

綱目木棉下注云棉有二種似木者名古貝今訛爲吉貝似草者名古終今俗呼棉花乃草棉也按代醉編棉花種爲番使黃始所傳宋末始入江南沈黃門炤曰番中有青黃白三種今特傳其白者耳不知江浙草棉多種藝而木棉罕見卽草棉中亦有黃色者不盡是白者入藥以白爲勝綱目有棉花油不言花及子功用悉爲補之

百草鏡云花可止血殼可治膈 膈食膈氣用棉花殼八九月採不拘多少煎當茶飲之三日卽愈忌食鵝

藥性考云草棉甘溫禦寒卻冷燒灰止血凍瘡敷穩子熱補虛煖腰治損油毒昏目塗癬疥等

子性熱味辛 治腸風救生苦海棉子丸取棉花子炒黃黑色去殼爲末用陳米濃汁加黑砂糖丸如桐子每日空心時滾水下三錢服至三筋斷根○腸紅秘方集驗棉子炒爲末用白糖拌米湯和服○血淋不止許氏方炒燥爲細末三白酒送下二錢立止○白帶沙淋救生苦海調經門香附散中用棉子仁○赤白帶下百草鏡棉花子炒黑去殼爲末米糊丸每服三錢赤帶用砂糖湯下白帶用白糖湯下○種子最妙方用棉花子砂糖各三錢沖酒服○薰洗痔傳信方鬼饅頭棉花子烏菱殼鳳尾草等分煎湯先熏後洗如疼加乳香癢加楊柳鬚或木稜藤○又方用棉花子同槐樹梗葉煎湯洗熏自

愈。○下血血崩不止。百草鏡。棉花子燒灰存性。酒下立止。○便毒。濟世方。用棉花子瓦煨存性。爲末。每日空腹酒下二錢。連服三次全消。兼治血崩。○陽痿不起。祝氏效方。棉花子水浸曬乾。燒酒拌炒。去殼用仁。半觔。破故紙鹽水炒。韭菜子炒。各二兩。爲末。葱汁爲丸。梧子大。每服二錢。空心酒下。○痢疾。救生苦海。棉花子仁。新瓦炒去油焦研細。每服二錢。紅用燈心湯下。白用好陳酒下。○癰疽棉花瘡。集驗。用棉花子一斗。燒酒拌和炒燥。去灰再拌再炒。以黑爲度。去殼再炒。擣爲末。用砂糖調和。每服三錢。服過一升許。卽愈。○除壁蝨。易堂驗方。硫黃末拌棉花子。燒煙薰二三次。卽絕。○中風口眼喎斜。便易良方。用棉花子炒黑爲末。乳香末三錢。紅糖二兩。飯後黃酒送下。卽愈。○腸風下血。不藥良方。生柿子二個。竹刀切去蒂核。以棉花子塞入柿內。仍蓋好。瓦上煨存性。研細末。米飲熱調服。重者三服全愈。○穀道生瘡。俗呼偷糞老鼠。不藥良方。用棉花子炒去殼。磨粉。每早中晚三次打糊服一盃。半月全愈。○治腎子大小偏墜。回生集。棉子煮湯入甕。將腎囊坐入甕口。俟湯冷。止一二次。散其冷氣。自愈。○癱瘓諸風。醫學指南。乳香沒藥各三錢。棉花子白糖各六錢。爲末。黃酒化服。出汗愈。○風蟲牙疼。家寶方。用韭菜子黑核桃肉。棉花子各一兩。分爲末。醋糊丸。火酒浸。咬在疼處。卽止。○痔漏。家寶方。用棉花子仁六兩。烏梅六兩。共搗爛爲丸。桐子大。早晚每服三錢。開水送下。服完卽愈。○經水過多不止。慈航活人書。棉花子瓦器炒盡煙。爲末。每服二錢。空心黃酒下。○小便血。劉羽儀經驗方。用棉花子炒枯存性。爲末。熱

火酒調服。服後在左腳大指節上有毛處。以豆大艾丸將火灸之。卽止。○盜汗不止。劉氏驗方。棉子仁三四錢。每日煎湯一盃。空心服。三四日卽止。○腸風。○腸紅下血垂危。德勝堂方。淮棉花核一升。槐米七錢。用天日芽茶四兩。泡汁。將二味炒燥。入茶汁內復泡。又炒。如此數次。汁乾爲度。磨末。每服三錢。空心酒調下。三日立愈。○治牙宣。蘭臺軌範。用棉花核煨灰擦。○治吹乳。郎興祖方。棉花子一兩。打碎。酒水同煎服。○治陰囊腎子腫大方。集驗。棉花子仁煎湯洗之。自愈。○血崩。龔雲林萬病回春。用棉花子仁炒黃色。甘草黃芩等分。爲末。每服二錢。空心黃酒下。○又集驗良方。用陳椶棉花子二味。燒灰存性。黃酒送下。卽止。○虛怯勞瘵。久嗽吐血不止。集效方。棉花子不拘多少。童便浸一宿。爲末。每服一錢。側柏葉湯下。諸藥不效。此方甚驗。酒調服。治血崩。○集聽云。棉子仁止血不寒。凡血症及婦人經病帶下崩淋。醋炒七次用。○心疼腹痛。集聽。用側柏葉米泔水浸三日。日易水一次。曬乾炒黑。棉子仁末一觔。配柏末八兩。如熱甚者對配。○種子方。集聽。棉子仁淨肉四兩。燒酒拌曬三次。熟地二兩。枸杞一兩。兔絲子。破故紙。茯苓。山藥。陳皮。五味子。連翹。何首烏。各一兩。蜜丸。鹽湯空心服四錢。○痔漏管。周氏家寶方。棉花子仁炒。急性子炒。蓖麻子仁炒。各等分。爲末。每服三錢。空心好酒下。輕者半月。重者一月。管自退。○出血不止。家寶方。棉花子燒灰存性。爲末敷之。○崩帶。家寶方。陳蓮蓬燒灰存性。五錢。棉花子肉燒灰存性。三錢。共一服。無灰酒調下。

治痰火後半身不遂。筋骨疼痛。核桃仁。棉花子仁。杜仲炒。巴戟。砂仁。骨碎補。枸杞子。續斷。牛膝。各二兩。大蝦米四兩。兔絲餅四兩。用燒酒二十觔煮服。如年高者。加附子肉桂各一兩。酒服完。將渣曬乾。爲細末。煉蜜爲丸。每服二錢。酒送下。

打老兒丸。良朋彙集方。久服延年卻疾。棉花子一觔炒去殼。核桃肉四兩打爛。用小米麪打糊爲丸。重三錢。滾湯服。

仙傳蟠桃丸。臥雲山人傳。大有補益。治諸虛百損。棉花子取淨仁。乾燒酒拌透。下用黃酒水平對。蒸一炷香。紅棗用黃酒煮熟。取淨肉。各一觔。歸身。牛膝。枸杞。俱用酒浸。肉菴蓉酒洗去泥。甲山茱萸酒潤去核。兔絲子酒蒸成餅。白魚鱉麩炒成泡。白茯苓人乳拌蒸。故紙鹽水炒。熟地酒煮如飴。以上藥各四兩淨。巴戟酒洗去心。五兩。共爲細末。煉蜜爲丸。三錢。早晚酒水任意送下。

棉花子丸。年希堯集驗良方云。烏鬚煖腎種子。陽虛人宜此。用棉花子十數觔。用滾水泡過。盛入蒲包。悶一炷香。取出。曬裂殼口。取仁。并去外皮。用淨仁三觔。壓去油淨。用火酒三觔泡一夜。取起。蒸三炷香。曬乾。故紙一觔。鹽水泡一夜。炒乾。川杜仲一觔。去外粗皮。黃酒泡一夜。曬乾。薑汁炒去絲。枸杞子一觔。黃酒浸蒸。曬乾。兔絲子一觔。酒煮吐絲爲度。共爲末。蜜丸。桐子大。每服二三錢。

長春丸。治腎虛精冷之症。集驗良方。魚鱉一觔。蛤粉炒成珠。極焦。棉花子取淨仁一觔。去油淨。酒蒸。

白蓮鬚八兩。金櫻子去子毛淨一觔。金釵石斛八兩。炒蒺藜四兩。枸杞子四兩。五味子四兩。炒鹿角五觔。鋸薄片。河水煮三晝夜。去角。取汁熬膏。和藥末爲丸。桐子大。每服三錢。

健步仙方。凌雲集。棉花子仁一觔淨肉。用燒酒三觔炒乾。枸杞子四兩。酒浸。杜仲四兩。鹽酒煮炒。兔絲子四兩。酒炒。歸身二兩。破故紙四兩。酒洗炒。胡桃仁四兩。共爲末。煉蜜爲丸。桐子大。每服三錢。空心滾湯下。

紫草茸

葉大椿痘學真傳云。紫草茸古本不見。近刻但在紫草項下。註明紫草茸染手者爲佳。竟不知別有一種。予幼時見世叔華泓卿家有紫草茸。爲發痘神丹。乃其高祖學士鴻山公使外國帶歸者。予取而藏之。每遇血熱毒壅。失血煩悶。頂陷不起。痘疔腫脹。於清解藥中研加四五分。無不神效。惜乎方書不載。不敢擅增本草。近見神應心書。獨標紫草茸。色澹紅。出烏思藏。着大樹枝上。如白蠟。其價如千金。不特發痘如神。用酒調服一二錢。能治諸腫毒惡瘡。又云。順手插一錢。酒下。力能催生。此液水譚應夢屢獲其效。併請正西番貢僧之語。至近時亦知茸非紫草之嫩苗。復誤認胭脂渣卽是紫草茸。此說更謬。○按紫草。本草諸方皆用根。韋宙獨行方治豌豆瘡不發。煮紫草湯飲。後人相承用之。則以之治痘涼血解毒。自此始也。曾世榮活幼新書云。紫草性寒。小兒脾氣實者。猶可用。脾氣虛者。反能作瀉。古惟用茸。

取其初得陽氣。以類觸類。所以用發痘瘡。則用茸亦見於此。而亦未聞有烏思藏所出一種。據葉所云。又似紫鉞。亦無的解。以其親試歷效。故存其說。以俟後之博訪。

治痘。及諸腫毒惡瘡。催生。

己亥冬。遇劉挹清少府於餘杭。言其祖曾任蜀藩。家有西藏紫草茸。皆成塊如指頭大。色紅而明透如琥珀。知葉所載爲不謬。

霍良痘科釋義云。痘科用紫草。古方惟用其茸。取氣輕味薄。而有清涼發散之功。凡下紫草。必用糯米五十粒。以制其冷性。庶不損胃氣。而致泄瀉。惟大熱便秘者不必加。

獨腳連獨腳一枝蓮。八角連。

粵西偶記。生廣西。草如黃連。根極大。持入藥肆。則諸藥香氣盡消。爲真。三腳五腳者次之。

百草鏡。此藥產廣東。根大如拳。春月發苗。經霜雪則死。若善藏過冬。則來年宿根復發。苗高尺許。葉大如杯。宛似荷葉。色綠柔厚。莖有細毛。六七月起莖。莖有白毛。開花微垂。似山蘭而小。其色微紅。

稗史。鄱陽山間生一種草。始萌芽時。便似蓮蓬。俗呼爲獨腳連。移植於居宅隙地及園圃中。蛇虺不敢過其下。王季光宅後榛莽叢中有蛇穴。常出爲人害。乃種此草數本於穴外。自是其患不作。至暑月間。穴內臭甚。使園丁掘土訪求。得死蛇十數。蓋爲草氣所熏潰也。又一小蛇來到草傍。立化爲水矣。○采

藥錄獨腳黃連苗葉如土大黃。面青背赤。根直色黃。此草根下有赤練蛇數條者方是。

按綱目鬼臼亦名獨腳連。無治疔之說。至集解下註形狀。又小有異同。故仍爲補之。庚戌予在臨安。有醫士盛天然言其地古城與餘杭接界。產獨葉花生山坑。不見天日。其形一葉。中含紅花一朵。儼如蓮花狀。其花從葉心透出。下有根。作獨蒜狀。其花葉聞人聲。輒縮入根內。不可見。遇之者記其處掘之。亦止有根。其葉與花。雖剖根覓之。亦無形迹。倘得之者。不論何等毒蛇咬。以根擦摩。蛇毒卽盡。如有誤服。蛇變繁者。以少許煎湯服之。卽瘥。併能解一切毒蟲咬螫。一切蠱毒草木毒。咽喉一十八症。皆驗如神。凡人鼻發紅色。生疥癩。掀癢異常。名曰痧蟲食鼻。以此根磨塗。立愈。此乃天生神物。有山行遇之者。不論持何物。先擲之以鎮住。然後再掘。卽不能遁形。凡生獨葉花地。四圍約尺許無草。其上不可手取。亦勿以鐵刀取。須用竹刀掘取。則不傷根。蓋此草。蛇最喜蟠其旁。凡蛇咬人。亦中人毒。必退殼。若覓此物。臥其旁一宿。則人毒解。可免退殼之患。大毒蛇都喜蟠其根旁。故土最毒。近人手則手爛。然得其根。反能解百種大惡蛇毒。丐者覓此。以爲得寶云。

治疔腫癰疽。以根或醋酒磨塗葉。貼癰腫能消。

治蛇咬。祝氏效方。用獨葉一枝花。生溪灘浮土上。根如鼠糞。用根。口嚼搽疔上。

退疔奪命丹。萬病回春云。此丹專治疔疔。防風八分。青皮七分。羌活。獨活。黃連各一錢。赤芍六分。細

辛八分。殭蠶一錢。蟬退四分。澤蘭葉五分。金銀花七分。甘草節一錢。獨腳連七分。紫河車卽金線重樓七分。右剉五錢。先服倍金銀花一兩。澤蘭一兩。少用葉。生薑十片。同搗爛。好酒盪熱泡之。去渣熱服。不飲酒者。水煎亦可。然後用酒水各一半煎生薑十片。熱服出汗。病退減後。再加大黃五錢同煎。熱服。以利二三次去餘毒。如有膿。加何首烏。白芷梢。在腳。加檳榔。木瓜。要通利。加青皮。木香。大黃。梔子。牽牛。獨腳一枝蓮。

百草鏡。山間有之。二三月苗發生。莖茅。俗名乾苜。叢中獨莖無葉。高尺許。莖細強。青白色。莖端有一疙瘡。至晚秋時。疙瘡生花。類蓮。其根與黃麻根相似。

治疔腫癰毒流注。

八角連

湧幢小品。綏甯產之。可以伏蛇。諺云。識得八角連。可與蛇共眠。

治一切毒蛇傷。

按瀕湖綱目有鬼臼。亦治毒蛇傷。鄭樵通志云。八角盤。卽鬼臼。今人所謂獨腳連是也。或粵語類舉其名。呼爲八角連。未可知。附存俟考。

汪連仕草藥方。八角盤起金星。名金星八角。嬰兒取爲獨腳連。俗呼獨葉一枝花。根如赤朮。多眼如馬

目今人呼馬目奪公消一切毒力能軟堅透膿

露花粉

粵志露花生番禺蓼浦狀如菖蒲其葉節邊有刺葉落根以火燻之成枝幹而多花花生叢葉中其瓣大小亦如葉而色瑩白柔滑無芒刺花抱蕊心如穗朝夕有零露在苞中可以解渴又有粉可入藥其生於他土者蕊落結子大如瓜曰路頭花多不香惟露花盛夏時露花始熟以花覆盆盪之香落茶子油中其氣馥烈是曰露花油蓼浦及增城人善爲之遲開者曰寒花香益清徹不可爲油其生東安山中者叢卑葉小自春至秋皆花近水者尤香亦不可爲油

塗兒女肌膚止汗

通血香

出西洋色如乾醬 百草鏡云出陝西羊羾客帶至杭貨賣

治血症及肝血氣入藥最良

膨脹 救生苦海通血香一錢取亞腰葫蘆一個不去子膜入香於內再入酒煮仍以所開之蓋合縫封固以陳酒安鍋內懸葫蘆於酒中揆定勿令傾倒將鍋蓋密煮三炷線香爲度煮時其香透屋牆之外煮完取出葫蘆內子膜并藥烘乾爲末每服一錢空心時酒下間五日再服一錢服盡葫蘆內藥服

五六錢卽愈。此方出廣筆記。云治脾虛有溼者。

瘰癧。良朋彙集有治瘰癧內消方。紫背天葵一兩五錢。海藻。海帶。昆布。各一兩。海螵蛸五錢。貝母。桔梗。各一兩。通血香三錢。右藥爲細末。酒糊爲丸。桐子大。每服七十九。食後溫黃酒送下。

痔漏通腸。海藥祕錄。胡連追毒方。專治痔漏。不拘遠年近日。有漏或通腸及污泥孔出者。先用此方。追盡膿血。後服黃連閉管丸。取效最穩。用胡黃連八錢。切片。薑汁拌炒。刺蝟皮一個。切片。炒黃爲末。通血香八分。須用真者。研末。麝香二分。共和勻。軟飯爲丸。麻子大。每服一錢。食前酒下。服藥後膿水反多。乃藥之功。勿懼可也。

黃連閉管丸。胡黃連淨末八錢。甲片。麻油內燻黃五錢。石決明煨過五錢。真通血香六分。不可少。槐花五錢。共爲細末。蜜丸。麻子大。每服一錢。空心清米湯下。早晚二服。重者二十一日收功。此方不用刀鍼。挂線之苦。誠起廢之良方也。如漏邊有硬肉突起者。加蠶繭二十一箇。炒末和入。此方及遍身諸漏。並治屢試屢效。

臟連丸。治痔漏無論新久。但舉發便下血作痛。肛門墜重者。膿血不止。腫痛難坐者。並治。胡黃連淨末八兩。通血香錢半。用雄豬大腸盡頭一段長一尺二寸。溫湯洗淨。將連末及通血香灌入腸內。兩頭以白絲線紮緊。煮酒二斤半。新砂鍋內煮酒將乾爲度。取起腸藥。各搗如泥。倘藥爛曬一時復搗爲丸。

桐子大。每服七十九。空心溫酒送下。久服除根。又名白銀定子。治漏有孔者。只須半月見功。神效。

三品一條鎗。白砒淨末一兩。白礬淨末二兩。明雄黃二錢四分。通血香八分。乳香一錢二分。先將砒礬研極細末。鐵杓鎔成餅。入炭火煨。煙淨取出。去火毒。爲末。和入雄黃。血香。乳香細末。作錠子。成條。播入漏內。直透裏痛處爲止。每日上三次。至七日爲止。半月瘡結而愈。如痛未痊。用生肌散收口可也。○生肌散治諸痔。諸瘡。腫毒。收口。神速大妙。乳香。沒藥。海螵蛸。用三黃湯煮過。寒水石煨過。輕粉。龍骨煨。赤石脂煨。冰片。各等分。共研細末。摻患處。外貼膏藥。

野馬豆

出西藏。乃番僧撚草末合成如豆形。故名。王怡堂云。藏中出一種草。彼土人呼爲野馬草。番僧擇日採之。研爲細末。置淨器中。供佛前。更擇日合和爲藥。其合藥之日。率彼土男婦皆於佛前誦咒。以所和草末。研爲丸。男丸者爲雄。婦丸者爲雌。藥亦分雌雄形。雄者丸上有小圓凸。雌者作長凹。色有紅有黑。皆如菉豆大。丸畢。仍置淨器中。必須雌雄合在一處。一二日能生出小豆。如麻子屑。飼以藏紅花。間日視之。紅花漸少。則新生之豆漸大。久則又生小豆。以此生生不息。亦一異也。如攜帶遠方。無藏紅花。豆亦不死。惟不能化生小豆耳。○西甯人曾玉瀛言。野馬豆。又呼嘛呢子。如半粒菉豆大。藏中人得此豆。每日輒誦唵嘛呢叭咪吽六字數百遍。丸豆時。亦口念此六字。故名。能治胃氣心痛。惟瘡痘瘡疾忌服。以

其善於長化顛倒陰陽也。○馬少雲衛藏圖識。藏中有子母藥。大裁可菉豆。以哈達潔裹之。經時小粒漸增。有子母相生之義。傳達喇嘛默持佛咒。以糝粳搓成者。故以奇異著。按此卽野馬豆也。○朱排山柑園小識。喇嗎嘗聚會以米麥數粒置瓶中。四人守之。誦唵嘛囉叭呢吽六字咒。飲食則代。無間晝夜。四十九日。有紅子滿瓶中。大如芥子。色似硃砂。謂之嘛囉子。佩之能辟邪致祥。小兒食之稀痘。○壬子。予從戚友處覓得嘛噠子數十粒。以玻璃盆貯之。形勻圓。儼似急性子而色紅。據云。初得時色不甚紅。苦無藏紅花。卽市本地河南所產紅花研屑拌之。久則色紅如硃砂。平瑤海先生偶得西藏嘛噠子數十粒。一時無玻璃器。乃卽置紙裹中供佛前。日誦文殊六字真言數百遍。其子能忽多忽少。又能透出紙裹外。變幻不常。異之以告客。客曰。此物性成本得西僧咒力。其造子之法。今都中喇嘛亦能爲之。每四月八日。大小喇嘛輒羣聚佛前。選高行持誦者數十人。鏡鈴法鼓。宣揚六字真言。七晝夜。其丸卽用乾麪手搓如粟米大。口念手丸。以金盆貯之。丸時得咒力。粒粒皆能自飛。或在窗櫺。或在案格。堆結團聚。俟七晝夜滿後。其不能飛者去之。其飛者用帚掃下。以送諸王大臣。名嘛噠子。可治諸疾。變幻多寡。蓋自其成性已然。無足異也。入藥以西藏合者佳。癸丑冬。在上虞署晤平司馬少君萊仲言。曾隨任中甸。其地係西藏要路。有喇嗎等。彼地呼野馬豆爲舍利子。有草木佛三種。彼土富人死。必納一粒口中。云入冥生光。土人有病。亦輒服之。○金御乘言。慈谿有患耳聾者。其家有藏中帶來嘛噠子。取服三

粒忽聞兩耳中大聲一震轟然如掣去數百觔物者嗣後耳更聰甚其人一日忽眠食妓家次日復歸如故再服亦無效矣。

味微辛性平治百病彼土無藥有病卽服此豆。

夏草冬蟲

出四川江油縣化林坪夏爲草冬爲蟲長三寸許下趺六足脰以上絕類蠶羌俗採爲上藥功與人參同○從新云產雲貴冬在土中身活如老蠶有毛能動至夏則毛出土上連身俱化爲草若不取至冬復化爲蟲○四川通志云冬蟲夏草出裏塘撥浪工山性溫煖補精益髓○黔囊夏草冬蟲出烏蒙窰外暑苗土爲草冬蟄土爲蟲○青藜餘照四川產夏草冬蟲根如蠶形有毛能動夏月其頂生苗長數寸至冬苗槁但存其根嚴寒積雪中往往行於地上○文房肆考邇年蘇州皆有之其氣陽性溫孔裕堂述其弟患怯汗大泄雖盛暑處密室帳中猶畏風甚病三年醫藥不效症在不起適有感自川歸遣以夏草冬蟲三觔逐日和葷蔬作餚燉食漸至愈因信此物保肺氣實腠理確有徵驗用之皆效○七榕園西城聞見錄夏草冬蟲生雪山中夏則葉歧出類韭根如朽木凌冬葉乾則根蠕動化爲蟲入藥極熱○徐后山柳崖外編冬蟲夏草一物也冬則爲蟲夏則爲草蟲形似蠶色微黃草形似韭葉較細入夏蟲以頭入地尾自成草雜錯於蔓草間不知其爲蟲也交冬草漸萎黃乃出地蠕蠕而動其尾猶

簌簌然帶草而行。蓋隨氣化轉移。理有然者。和鴨肉頓食之。大補。紹興平萊仲先生言。其尊人曾任雲南麗江府中甸司馬。其地出冬蟲夏草。其草冬爲蟲。一交春。蟲蛻而飛去。土人知之。其取也有期。過期無用也。○朱排山柑園小識。冬蟲夏草。生打箭爐。冬生土中。如蠶。夏則頭上生苗。形長寸許。色微黃。較蠶差小。如三眠狀。有口眼。足十有二。宛如蠶形。苗不過三四葉。以酒浸數枚。啖之。治腰膝間痛楚。有益腎之功。以番紅花同藏。則不蛀。或云。與雄鴨同煮食。宜老人。

潘友新云。粵中鴉片丸。用夏草冬蟲合鴉片人參合成。乃房中藥也。此草性更能興陽。則入腎可知。甘平。保肺益腎。補精髓。止血化痰。已勞嗽。治膈症皆良。從新味甘性溫。祕精益氣。專補命門。藥性考。

按物之變化。必由陰陽相激而成。陰靜陽動。至理也。然陽中有陰。陰中有陽。所謂一陰一陽。互爲其根。如無情化有情。乃陰乘陽氣。有情化無情。乃陽乘陰氣。故皆一變而不復返本形。田鼠化鴛。鴛化田鼠。鳩化鷹。鷹化鳩。悉能復本形者。陽乘陽氣也。鍾石化丹砂。斷松化爲石。不復還本形者。陰乘陰氣也。夏草冬蟲。乃感陰陽二氣而生。夏至一陰生。故靜而爲草。冬至一陽生。故動而爲蟲。輾轉循環。非若腐草爲螢。陳麥化蝶。感溼熱之氣者可比。入藥故能治諸虛百損。以其得陰陽之氣全也。然必冬取其蟲。而夏不取其草。亦以其有一陽生發之氣可用。○張子潤云。夏草冬蟲。若取其夏草服之。能絕孕無子。猶黃精鈎吻之相反。殆亦物理之奧云。周兼士云。性溫。治蠱脹。近日種子丹用之。

嫩老鴨法。○用夏草冬蟲三五枚。老雄鴨一隻。去肚雜。將鴨頭劈開。納藥於中。仍以線紮好。醬油酒如常蒸爛食之。其藥氣能從頭中直貫鴨全身。無不透浹。凡病後虛損人。每服一鴨。可抵人參一兩。

綿絮頭草

一名金沸草。一名地蓮。俗呼黃花子草。生郊野。立春後發苗。葉多白毛。似綿絮。至立夏開黃花。一莖直上。花成簇。處處山坡有之。鄉人初春採其葉。揉粉作餼食。清香堅韌。最適口。此草形小。布地生葉。似熨火而薄。摘之有白絲。色青白。本小如翦刀草。○按綱目有鼠麴。俗名毛耳朶。葉有白茸。又名茸母。宋徽宗詩。茸母初生認禁煙。卽此蟻食此草卽醉。故又名蚍蜉酒草。然其功用亦止載其能治寒熱欬嗽。去肺寒。大升肺氣而已。今別補其功用。

味酸性熱。多食損目。治囊風溼癢。煎湯洗。愈兒疔梅瘡。下疳。同甘草煎洗。

鴉膽子

一名苦參子。一名鴉膽子。出閩廣。藥肆中皆有之。形如梧子。其仁多油。生食令人吐。作霜搥去油。入藥佳。

治痢。何夢瑤醫礪。鴉膽丸。用鴉膽子去殼搥去油一錢。文蛤醋炒。枯礬川連炒。各三分。糊丸。硃砂爲衣。或鴉膽霜。黃丹各一錢。加木香二分。亦可。烏梅肉丸。硃砂爲衣。二方俱丸。菘豆大。粥皮。或鹽梅皮。或

圓眼乾肉。或芭蕉子肉。包吞十一二丸。立止。

裏急後重。吉雲旅抄。用鴉膽卽苦榛子。去殼留肉。包龍眼肉。每歲一粒。白滾水下。

治痔。金御乘云。近日閩中板客皆帶鴉膽子來。治痔如神。有患者。以子七粒。包圓眼肉吞下。立愈。

至聖丹。治冷痢久瀉。百方無驗者。一服卽愈。凡痢之初起。實熱實積。易知而易治。惟虛人冷積致痢。醫多不以爲意。蓋實熱之症。外候有身熱煩躁。唇焦口渴。肚疼窘迫。裏急後重。舌上黃胎。六脈洪數。證候既急。治者亦急。輕則疎利之。重則寒下之。積去而和。其陰陽無不愈者。至於虛人冷積致痢。外無煩熱躁擾。內無肚腹急痛。有赤白相兼。無裏急後重。大便流痢。小便清長。此由陰性遲緩。所以外症不急。遇此不可姑息。但以集成三仙丹下之。以去其積。倘不急下。必致養虎貽患。其積日久。漸次下墜。竟至大腸下口直腸上口交界之處。有小曲摺。隱匿於此。爲腸穢最深之處。藥所不到之地。證則乍輕乍重。或愈或發。便則乍紅乍白。或硬或溏。總無一定。任是神丹。分毫無濟。蓋積不在腹內。而在大腸之下。諸藥至此。性力已過。盡成糝糠。安能去此沈匿之積。所以冷痢有至三五年十數年不愈者。由此故也。古方用巴豆爲丸下之者。第恐久病人虛。未敢輕用。今以至捷至穩鴉膽子一味治之。此物出閩省雲貴。雖諸家本草未收。而藥肆皆有。其形似益智子而小。外殼蒼褐色。內肉白有油。其味至苦。用小鐵錘輕敲其殼。殼破肉出。其大如米。敲碎者不用。專取全仁用之。三五歲兒二十餘粒。十餘歲者三十多粒。大

人則四十九粒。取大圓肉包之。小兒一包三粒。大人一包七粒。緊包。空腹吞下。以飯食壓之。使其下行。更藉此圓肉包裹。可以直至大腸之下也。此藥並不峻厲。復不肚痛。俟大便秘時。有白凍如魚腦者。即冷積也。如白凍未見過。一二日再進一服。或微加數粒。此後不須再服。服時忌葷酒三日。戒鴨肉一月。從此除根。永不再發矣。倘次日腹中虛痛。用白芍一枝。甘草一枝。各重三錢。紙包水溼。火內煨熟。取起。槌爛。煎湯服之。立止。此方不忍隱祕。筆之於書。以公世用。

痢疾神方。醫宗彙編。用白石榴燒灰一錢。真鴉片切片二錢。鴉膽子去殼紙包。壓去油三兩。人參三分。枯礬二分。海南沈香三分。共爲細末。調粥爲丸。重五六釐。曬乾。磁瓶收貯。紅痢用蜜一匙。滾水調下。紅白相兼。陰陽水送下。肚脹。滾湯下水。瀉米湯開水送下。忌油膩腥酸一月。

元寶草

生江浙田塍間。一莖直上。葉對節生。如元寶向上。或三四層。或五六層。此草有兩種。一種兩葉包莖。亦對節生。一種獨葉。莖穿葉心。入藥以獨葉者爲勝。○百草鏡。元寶草生陰土。近水處多有之。穀雨後生苗。其葉中闊兩頭尖。如梭子形。穿莖直上。或五六層。或六七層。小滿後開花黃色。氣性涼。辛寒。百草鏡。性涼。補陰。治吐血衄血。跌撲閃腰挫疼。癰毒。

雀梅

一名爵梅。葉如薔薇。結實如梅而小。百草鏡云。有一種山雀梅。枝不蔓曲。是樹不實。亦有高大者。按爵梅綱目主治。蝕惡瘡。外皆不載。今復補其功用。○綱目郁李下引詩疏云。一名雀梅。與此名同物異。亦不言治癰毒。

葉酸寒。治乳癰便毒。有奇效。瀉熱解毒。

鐵烏鈴

采藥書又名鐵鈴草。其本色黑。葉梗根堅實如鐵。其汁黑。可烏鬚。

主治楊梅惡瘡。風氣癱瘓。損折筋骨。俱煎酒服。汪連仕方。

爛酣草

俗名爛孩兒。處處人家種之。葉尖大如指甲。有枝梗。夏月開細紫花成簇。結子亦細。今人種於盆內。婦人暑月採之插髮。可辟膩腫。

芳香辟惡。去臭氣。辛溫和中。止霍亂吐瀉。行氣活血。發瘡者。塞鼻。能令寒熱漸輕。

土當歸

荷包牡丹之根。今人呼活血草。卽土當歸也。

汪連仕云。用其根搗汁。酒沖服之。令人沈醉。金瘡之聖藥也。

開金鎖

從新云。產江浙。葉如草薺。高三四尺。根如首烏而無稜。肉白色而無紋。略似菝葜而無刺。苦平。祛風溼。同蒼朮當歸。治手足不遂。筋骨疼痛。

鐵指甲

李氏草祕。其草葉似指甲。生牆腳階岸石砌間。

王安采藥方。此草沿松樹上。一名佛指甲。一名寄生。

治諸癩毒火丹。頭面腫脹。將危者。少入皮消搗罨之。立愈。李氏草祕。牙疼。煨末擦之。立效。王安。

雪裏青荔枝草附。

一名土犀角。一名過冬青。生田塍間。葉如天名精而小。布地生。無枝梗。葉有細白毛。四時不彫。雪天開小白花。又荔枝草亦名雪裏青。○百草鏡云。雪天開小白花者。乃過冬青。三月起莖。花自成穗。如夏枯草有毛者。名雪裏青。

味苦大寒。瀉熱。治咽喉急閉。搗汁灌之。甚效。

王氏驗方云。能行上焦。治腫痛。散風火結滯。○欬血。雪裏青根。精豬肉切片。層層隔開。白酒淡煮至爛。食之。○肺痿。雪裏青搗汁。加蜜和勻。作二次服。每日服五七次。七日全愈。○齒痛。雪裏青搗汁含痛處。

再用酒和服少許。○痔。雪裏青湯洗之。○吹喉。薄荷一兩。雪裏青五錢。加冰片三分爲末。吹喉。或吹鼻。孔亦可。○肺癰。集效方。雪裏青搗汁。沖酒服之。立效。○黃雨巖云。危篤肺癰痿症。第一用雪裏青搗汁。服。如吐尤妙。○治單雙蛾。木蓮蓬。雪裏青根葉。搗汁。米醋滾過。沖入前汁。含少許。咽之。吐出卽愈。

荔枝草

一名皺皮葱。丹術家入爐火用。○百草鏡云。荔枝草冬盡發苗。經霜雪不枯。三月抽莖。高近尺許。開花細紫成穗。五月枯。莖方中空。葉尖長。而有麻纍。邊有鋸齒。三月採。辛亥。予寓臨安署中。見荒圃中多此物。葉深青。映日有光。邊有鋸齒。葉背淡白色。絲筋紋輟。綻露麻纍。凹凸最分明。凌冬不枯。皆獨瓣。一叢數十葉。點綴砌草間。亦雅觀也。

性涼。涼血。葛祖遺方。治咽喉十八症。消癰腫。楊梅痔瘡。

急驚。集聽。荔枝草汁半鍾。水飛過硃砂半分。和勻服之。立愈。

小兒疳積。集聽。荔枝草汁入茶盃內。用不見水雞軟肝一個。將銀鍼鑽數孔。浸在汁內。汁浮於肝。放飯鍋上蒸熟食之。卽愈。

喉痛。或生乳蛾。救生苦海。用荔枝草搗爛。加米醋絹包裹。縛筋頭上。點入喉中數次。愈。

雙單蛾。集效方。雪裏青一握。搗汁。半茶鍾滾水沖服。有痰吐出。如無痰。將雞毛探吐。若口乾。以鹽湯

醋湯止渴。切忌青菜菜油。

痔瘡。活人書。雪裏青汁炒槐米爲末。柿餅搗丸。如桐子大。每服三錢。雪裏青煎湯下。

白濁。張彙漪傳方。雪裏青草。生白酒煎服。

無名腫毒。葉天士效方。雪裏青一握。鮮者佳。加金剪刀同搗爛。入酒糟半鍾。共搗敷。不必留頭。輕者自散。重者雖出膿無妨。

治鼠癩。經驗廣集。用過冬青。卽荔枝草。又名天名精。五六枚。同鱖魚入鍋煮熟。去草及魚。汁飲數次。愈。

汪連仕草藥方。鳳眼草卽荔枝草。土人稱爲賴師草。醫家名隔冬青。涼血止崩漏。散一切癰毒最效。落得打

一名土木香。山雄黃。五香草。從新云。近處有之。苗高尺許。葉如薄荷。根如玉竹而無節。搗爛則黏。○按從新所說。似今人所名爲紫接骨者。落得打。予養素園中曾種之。苗長二三尺。葉細碎如蒿艾。秋開小白花。結子白色。成穗纍纍。如水紅花。但白色耳。故又名珍珠倒捲簾。治跌打損傷。神效。曾記辛巳年小婢失足。從樓梯墜下。瘀血積滯。因採此搗汁沖酒服。以渣罨傷處。一飯頃。疼塊卽散。內瘀亦瀉出。葉有清香者。是此藥。以家種隔二三年者。入藥用良。野產者。入藥有草氣。胃弱者服之多吐。○百草鏡云。此

草立春後始發苗。十月枯。八月開花。苗葉如菊艾。有歧尖而薄。五月採嫩枝入藥。○李氏草祕。七葉草。一名落得打。一名活血丹。雖名草實樹。其樹高一二尺五七尺不等。搗汁和酒服。治打傷撲損。疔瘡腫毒。煎洗痰核癰癤。久久自消。敏按此言木本。當又是一種。

甘平。治跌打損傷。及金瘡出血。並用根煎服。或搗敷之。不作膿。

葛祖方。治跌打損傷。無名腫毒。去瘡瘀血。死肉不痛。

百草鏡云。性甘香溫。入脾經。去風調氣。活血。

花。擦牙疼。治頭風及風氣。

苦花子

一名毛蓮子。又名小葉金雞舌。又名苦花椒。入藥梗葉並用。

治疔瘡癰毒。蛇傷。熱腹痛。熱喉風。並效。搗汁搗水。夏冷服。冬溫服。

佛手草

朱煥齋任城日鈔。杭州秦亭山聖帝殿廚房後石臺基上有草。狀如百合。名百合草。一名佛手草。寺僧藉以貨售。香客以入藥。

治瘡。不論何種惡瘡。以此草煎湯洗之。卽愈。敏按王安采藥方。射干。一名佛手草。不治瘡。與此別。

草石蠶

餘杭山中多有之。葉似大葉金星。根黑色。如蠶。○按甘露子亦名草石蠶。與此別。○前溪逸志。銅官山生石蠶。藤也。以石爲土。形則蠶也。採食之。可已風痹。○本草石蠶。乃石似蠶者。非真蠶也。藤之蠶根於石。石之蠶伏於土。非格物君子。焉能辨其名號。識其性情哉。

治虎傷收口。用之。虎咬成瘡。口不斂者。爲末。摻上。卽癒。風痹。羊毛痧。

敏按王安采藥方。金星鳳尾。卽寶劍草。其根名石蠶。能解硫黃毒蛇毒。治發背癰疽。結核等症。竹木魚刺。黃疸熱淋。洗眼疾。陰溼瘡。似此則非藤蠶甘露子明矣。

毛葉仙橋貓舌仙橋附。

一名翠梅草。百草鏡云。春月發苗。葉狹尖。糙澁。微有毛。三月開花。碧色。至五月間。其莖蔓延。黏土生根。兩頭如橋。故名。三月採去根。

性寒。葛祖方。治失力黃。能退諸瘡。熱血風火氣毒。○百草鏡云。散風火。利溼熱。治白火丹疥瘡。澀精。○白濁。用毛葉仙橋三錢。酒煎服。

李氏草祕。仙橋草。形似橋。倒地生根。葉似柳。厚背紫色者多。秋開紫花一條。治疔瘡。諸毒癰腫。用此草搗汁加酒服。雖發狂垂死。入口卽生。○汪連仕云。細葉者。紫背仙橋。背必須紫色。延蔓倒地如橋。土人

名爲疔瘡草。能消疔腫。拔根合蒼耳草酒煎服。

貓舌仙橋

汪氏草藥方。貓舌仙橋葉面生刺。草本場地。生花青紫。多產水澤旁。

治疔瘡。理黃疸。一切溼火。汪氏。

荷包草

一名肉餛飩草。一名金鎖匙。生古寺園石間。似地連錢而葉有縐紋。形如腰包。青翠可愛。○百草鏡云。二月十月發苗。生亂石縫中。莖細。葉如芡實大。中缺。形似挂包餛飩。故名。蔓延貼地。逐節生根。極易繁衍。山家階砌亂石間多有之。四月十月採。過時無。

性微寒。治黃白火丹。去溼火。兼神仙對坐草用。○清五臟。點熱眼。止吐血。洗痔瘡。調婦人經。忌鹽。

水腫初起。百草鏡云。活鮑魚大者一尾。用瓷片割開。去鱗及腸血。以紙拭淨。勿見水。以荷包草填腹。令滿。甜白酒蒸熟。去草食魚。

利溼熱。治黃白疸。臌脹。白濁。經閉。搗汁點熱眼。煎湯洗痔瘡。腫痛。百草鏡。

疝氣。周氏家寶。用荷包草研爛汁。酒送服。此草形似荷包。上面有二子。初生時有葉無子。須至六七月方生。

黃疸。家寶方。荷包草。螺螄三合同搗汁。澄清。煨熱服。

眼中生疔。眼科要覽。用肉餛飩草連根葉。和酒漿板搗汁。飲二三次。即愈。酒漿板。即酒釀糟也。

蛇咬。家寶方。鶴頂紅。即灰藟。肉餛飩。野甜菜。三味共搗敷之。

鼠牙半支

生高山石壁上。立夏後發苗。葉細如米粒。蔓延絡石。其根嵌石罅內。白如鼠牙。百草鏡載各種半支。有七十二種。此爲第一。○百草鏡。鼠牙半支。二月發苗。莖白。其葉三瓣一聚。層積蔓生。花後即枯。四月開花。黃色。如瓦松。

性寒。消癰腫。治溼鬱水腫。

治諸毒及湯烙傷疔癰等症。蟲蛇螫咬。蔣儀藥鏡拾遺賦。半枝蓮解蛇傷之仙草。

半枝蓮飲。百草鏡云。治一切大毒。如發背。對口。冬瓜騎馬等癰。初起者消。已成者潰。出膿亦少。鼠牙半支一兩。搗汁。陳酒和服。渣敷留頭。取汗而愈。章南聞試效。

狗牙半支 虎牙半支 附

生陰溼地。立夏前發苗。葉尖細。作品字式。層覆而生。夏至時。開花黃色。類瓦松。花後即死。其年雨水多。其草必茂。葉大者曰虎牙。

治癰疔便毒黃疽喉癰。救生苦海。用狗牙半支搗汁。加陳京墨磨汁。和勻漱喉。日咽四五次。甚者半月愈。○天蛇頭。疹不可忍。醫宗彙編。用半支連同香糟搗爛。少加食鹽。包住患處。疹卽止。

虎牙半支功同。

汪連仕采藥書。虎牙半支。性寒涼無毒。葉片大者。羊角半支。葉扁大者。馬牙半支。俱生陰山谷中。治疔腫火毒痔漏。神效。

馬牙半支

一名醬瓣半支。鐵梗半支。又名山半支。生石壁上。葉大叢生。圓如醬中豆瓣。故名。○百草鏡云。醬瓣半支。又名旱半支。葉如醬中豆瓣。生石上。或燥土平隲。皆有之。蔓生。二月發苗。莖微方。作水紅色。有細紅點子。經霜不彫。四月開花黃色。如瓦松。山左人以爲菜茹。○江獻祥云。此有二種。有紅梗青梗之別。治婦人赤白帶第一妙藥。赤帶用赤梗者。白帶用白梗者。採得搗汁半酒盞。酸迷迷草亦有赤白二種。赤帶用赤者。白帶用白者。搗汁半酒盞。和勻。加紹酒半盞。煮熟。一服卽止。永不復發。

性寒。消癰腫。治溼熱。利水和血。腸癰痔漏。

治蛇咬疔疽。便毒風癩。跌撲黃疽。擦汗斑尤妙。○百草鏡。跌撲用醬瓣半支一握。搗汁。陳酒和服。絕瘡。家寶方。醬板豆草。六月六日雞鳴時采。略洗。蒸熟。一日曬乾。不乾焙之。每一觔配老薑一觔。磨

細收貯。一日者一錢。二日者二錢。三日者三錢。酒調服。服後飲酒至醉爲妙。合時忌雞犬婦人見之。神效。

狗咬。以酒洗淨瘡口血。搗醬板半支。罌上一二日。卽癒而愈。王小靜試驗。

癩癧。金養淳云。馬牙半支。作菜常服。多年癩癧皆消。屢試屢驗。

治急痧。用醬瓣草陰乾。每服三錢。水煎服。

治淋疾。奇方類編。用芝麻一把。核桃一個。石上馬牙半支。共搗碎。生酒沖服。

治水腫。汪連仕云。取醬瓣草。搗合麝香。貼臍眼。如人行五里。其水卽下。

狗尾半支

百草鏡云。生類垣牆側。人家荒圃中尤多。俗呼狗尾草。葉如茅。六月開花。形如狗尾。採取花莖。下截陰乾。用綱目狗尾草。下止載穿疣目。去赤眼惡血。而不言別功用。故爲補之。

治疔癰癬。面上生癬。取草數莖。揉軟。不時搗之。卽愈。

風粟癩疹。狗尾草莖。刮出瘀血。避風數次。自效。見杭集三方。

羊毛癩。家寶方。一名羊毛痧。以狗尾草煎湯內服。外用銀鍼挑破紅癩。用麻線擠出瘰中白絲。如羊

毛狀者。卽愈。否則脹死。

金雞獨立草

散喉風。採藥志云散喉癰之聖藥。

敏按此卽翠羽草宜併。

神仙對坐草

一名蜈蚣草。山中道旁皆有之。蔓生。兩葉相對。青圓似佛耳草。夏開小黃花。每節間有二朶。故名。按外科全生云。此草梗葉長青。經冬不衰。殊不知春生秋死。不衰之說謬矣。○百草鏡云。此草清明時發苗。高尺許。生山隰陰處。葉似鵝腸草。對節立。夏時開小花。三月採。過時無。○王安采藥方。一名地蜈蚣。黃疸初起。又治脫力虛黃。○百草鏡。用神仙對坐草。三葉白。荷包草。平地木茵陳。各三錢。水煎。分三服。早中晚下。一服全愈。脫力虛黃五劑。

祝氏效方。洞天仙草。皆用之。又毒蛇咬。搗此草汁飲。以渣罨傷口。立愈。一切疝氣。劉羽儀驗方。仙人對坐青木香二味。搗汁沖酒服。立效。

治反胃噎膈。水腫臃脹。黃白火疽。疝氣陰症傷寒。王安。

紫羅欄

白花者良。產溪澗者尤佳。其根入藥。不可多服。令人吐瀉傷胃氣。

治臃腫腫滿。清利水道。土產者治跌打損傷。取根搗酒服少許。汪連仕採藥書。

龍鬚草 野蓆草 烏龍鬚

一名又雞草。綠袍草。鐵線草。鐵線筒。人字草。似扁蓄而小。細圓。與綱目石龍芻別。○百草鏡云。生山澤。穀雨後發苗。與野蓆草相類。但蓆草之葉直上。此草橫生布地。小滿時抽莖。開花青細。○德勝堂傳方。棒槌草。亦名丫雞草。治跌打。○汪連仕方。甌人以此織蓆。有石龍芻草。龍芻之名。後訛芻爲鬚。土產者。卽又雞草。又名鹿跑草。治一切瘡疥。至真織蓆龍鬚。其性溫和。散風火。大理溼熱。治口咽諸毒。火症牙痛。

野蓆草

生山澤水旁。較蓆草稍短細。亦名龍鬚草。清明後生苗。小滿時開花細小。根類竹根。黑色。入藥取根用。止血崩。風氣疼痛。鶴膝風。夢遺。酒煎服。湯煎洗。出汗。草藥鑑。利溼熱。治癰淋精濁。崩中溼痺。鼻衄。疔腮。明目。疔痛。口咽諸毒。火症。鶴膝風。百草鏡。瘰癧。痰核。王用予。鼻中不時出血。野蓆草根煎服。一盤珠。齒牙疼痛。動搖欲落者。○仁惠方。用野蓆草根煎湯代茶服。一二日牙疼自止。永不再發。齒牙動搖者。亦堅固如石。

烏龍鬚

徐一士云。有鄉人行野田中。見老烏柏樹上。挂生細長草一叢。如燈心狀。下垂。一道士指謂曰。此名烏龍鬚。乃五福星所照在樹而生。此取曬藏之。可治痼疾一切血症。鄉人如其教。後用頗驗。

治癰腫一切血症勞瘵。

眞珠草與菜部眞珠菜異。

臨症指南云。珍珠草一名陰陽草。一名假油柑。此草葉背有小珠。晝開夜閉。高三四寸。生人家牆腳下。處處有之。癸亥子寓西溪看地。見山野間道旁有小草。葉如槐而狹小。葉背生小珠。如鳳仙子大。疊疊直綴。經霜輒紅。詢土人皆不識。偶歸閱指南。始悟此卽眞珠草也。薄暮取視。其葉果閉。治小兒百病。及諸疔瘦弱眼欲盲。皆效。爲末。白湯下。或蒸煮魚肉食。指南。

九龍草

百草鏡云。生石上。蔓延丈餘。節處生根。苗頭極多。葉絨細青色。又名九頭獅子草。又名金釵草。按綱目。九龍草僅於雜草內附見。而所引楊清叟外科方一條。述其苗葉。尙是此草。至云生紅子如楊梅。則誤矣。

性溫。行血脈。治風痺跌撲損傷。雙單蛾痛風。

爛癰。家寶方。九龍草搗同醬板罨。

除臭蟲。經驗廣集。取九頭獅子草。放牀四角。每角用二三顆。置草薦下。任其自乾。去臭蟲神妙。紅白蛇纏。王氏祕方。九龍草焙存性。麻油調搽。周氏家寶治毒蛇咬。用九龍草搗汁半盃。雄黃二錢。酒沖服。痛止。此草生紅子如楊梅樣。搗汁亦可治喉痛。按此則楊清叟外科所載形狀同。或名同物異。與獅子草迥殊。並存以俟考。

石打穿鐵筴帚。

葛祖方。一名龍芽草。石見穿。地胡蜂。地蜈蚣。○百草鏡。地蜈蚣與神仙對坐相似。惟葉上有紫斑爲別。且神仙對坐草之花。每節兩朵。此則攢聚莖端。或三四或五六相聚爲別。疑卽石見穿。○龍芽草生山土。立夏時發苗布地。葉有微毛。起莖高一二尺。寒露時開花成穗。色黃而細小。根有白芽。尖圓似龍芽。頂開黃花。故名金頂龍芽。一名鐵胡蜂。以其老根黑色。形似之。又一種紫頂龍芽。莖有白毛。葉有微毛。寒露時抽莖。開紫花成穗。俱二月發苗。葉對生貼地。九月枯。七月採。○按石打穿。綱目於有名未用下列之。只言止痛。大風癰腫。不言他用。而葛祖遺方載其功用甚廣。並有諸名。考之百草鏡。龍芽二種。與地蜈蚣俱非一物。論其功用。石打穿治黃疸。地蜈蚣治跌撲黃疸。故百草鏡因其用相同。於地蜈蚣下註。疑卽石打穿。於龍芽草下註。亦名石見穿。治下氣活血。理百病。散痞滿。跌撲吐血。崩痢腸風下血。明明二種功用各異。不知葛祖方何以混爲一。此書傳自明末。或有舛訛。或有的識。未敢妄議。附識於

此以俟再考。○敏按蔣儀藥鏡拾遺賦云。滾咽膈之痰。平翻胃之噦。石打穿識得者誰。註。噎膈翻胃。從來醫者病者羣相畏懼。以爲不治之症。余得此劑。十投九效。不啻如饑荒之粟。隆冬之裘也。乃作歌以誌之。歌曰。誰人識得石打穿。綠葉深紋鋸齒邊。闊不盈寸長更倍。圓莖枝抱起相連。秋發黃花細瓣五。結實匾小鍼刺攢。宿根生本三尺許。子發春苗隨弟肩。大葉中間夾小葉。層層對比相新鮮。味苦辛平入肺臟。穿腸穿胃能攻堅。採掇莖葉擣汁用。蔗漿白酒佐使全。噎膈飲之痰立化。津嚙平復功最先。世眼愚蒙知者少。岐黃不識名浪傳。丹砂句漏葛仙事。余愛養生著數言。據歌中所言形狀。則又似鐵筴筴。故並存其說而附錄之。○癸丑。余親植此草於家園。見其小暑後抽莖。屆大暑卽著花吐蕊。抽條成穗。儼如馬鞭草之穗。其花黃而小。攢簇條上。始悟馬鞭草花紫。故有紫頂龍芽之名。此則花黃。名金頂龍芽。與地蜈蚣絕不相類。因此草亦有地蜈蚣之名。故百草鏡疑爲石見穿也。○李氏草祕。石見穿生竹林等處。葉少如艾。而花高尺許。治打傷撲損膈氣。則石見穿之葉如艾。又與石打穿之葉深紋鋸齒不侔矣。

葛祖方。消宿食。散中滿。下氣。療吐血各病。翻胃噎膈。瘡疾。喉痹。閃挫。腸風下血。崩痢食積。黃白疔。疔腫。癰疽。肺癰。乳癰。痔腫。

乳癰初起。百草鏡。龍芽草一兩。白酒半壺。煎至半盃。飽後服。初起者消。成膿者潰。且能令膿出不多。

鐵筴箒

山間多有之。綠莖而方。上有紫線紋。葉似紫頂龍芽。微有白毛。七月開小黃花。結實似筴箒形。能刺人。手。故又名千條鍼。○百草鏡。芒種時開花成簇。○種福堂方。鐵筴箒卽石見穿。綱目。馬蘭子亦名鐵筴箒。其葉似薤。根如刷帚。與此全別。草寶云。鐵筴箒葉似紫頂龍芽。而無毛爲別。七月開小黃花。結實類筴箒。能刺人手。故名黃疽。用此草。乾者一兩。白酒煎服。四五劑卽愈。

治風痺血崩黃疽吐血跌撲鬼箭風如神。擣敷肩癰鶴膝風。鮮者連根葉。如秋冬根老。取葉汁加飛麪調勻包紮。煎湯浴瘡疥立愈。

治風痺鶴膝等風。○茅崑來效方。鐵筴箒三兩。龍眼肉半觔。酒煮飲。○又方。鐵筴箒。白毛藤。地蘇木。龍芽草。蒼耳草。各一兩。酒煎服。五劑。

風痺藥酒。○救生苦海云。并治跌打瘋腫。鐵筴箒。八角金盤根。白毛藤。蘇木。絡石藤。各一兩。酒浸十日用。

跌打傷。金居士選要方。用鐵筴箒三兩。酒煎服。

鬲症。蔣雲山傳方。石打穿草。按月取草頭一個。如三月三個。四月四個。以月分爲多寡之數。搗汁。同人乳羊乳汁攪勻服。立效。

面上斑駁。朱子和方。取鐵筭筭地上。自落下葉并子。煎湯澄清。洗面三四次。其斑自消。
鶴膝風。種福堂方。石見穿草。用根梗俱紅色者佳。連枝俱用。如秋冬根梗俱老。止用葉半分。俱要當日取新鮮者。隔宿勿用。同鐵筭筭草一分。加飛麩少許同打。紮膝眼內。

狗卵草

一名雙珠草。生人家頽垣古砌間。葉類小將軍草而小。穀雨後開細碎花。極間結細子似腎。又類椒形。青色微毛。立夏時採。○百草鏡云。蔓延而生。喜生土牆頭。二三月採。五月無。二月發苗。乃小草也。三四月間節極中結子。形如外腎。內有兩細核。性溫。治疝氣。行下部。發大汗爲妙。治腰痛。

疝氣澹寮方。用狗卵草。草鮮者二兩。搗取汁。白酒和服。飢時服藥盡。醉蒙被暖睡。待發大汗。自愈。此草性溫。能達下部。如無鮮者。須三四月預採曬乾存貯。倘用乾者。止宜一兩。煎白酒。加紫背天葵五錢。同煎更妙。○庚戌。予館臨安。暑後荒圃多生此草。驚蟄後發苗。似小將軍而葉較小。色亦淡綠。春分後。卽開花。細碎藕合色。節極輒有花。結子如狗卵。頗壯滿可觀。其草蔓地。千百穗併一根。立夏後多槁。予同舍許氏子。髫年患疝。發輒作厥。以此草煎酒服。後永不再發。

一粒金丹

一名洞裏神仙。又名野延胡。江南人呼飛來牡丹。處處有之。葉似牡丹而小。根長二三寸。春開小紫花。

成穗似柳穿魚。結子在枝節間。生青老黃。落地復生小枝。子如豆大。其根下有結粒。年深者大如指。小者如豆。一種黃花者乃蒿屬。根上亦無子。採取不可誤用。

治跌打損傷風氣。消癰腫。便毒。癩。癰。天蛇毒。鴉翅毒。搗敷火丹痔。腫風痹。因肭腰痛。腫毒初起。百草鏡取一粒。金丹根上子一兩。搗汁。陳酒和服。并治癩癰初起。

兔耳一枝箭獨葉一枝鎗。金邊兔耳。兔耳酸。

生陰山腳下。立夏時發苗。葉布地生。類兔耳形。葉厚。邊有黃毛軟刺。莖背俱有黃毛。寒露時抽心。高五寸許。上有倒刺而軟。卽花也。每枝只一花。故名一枝箭。入藥用綿裹煎。恐有毛戟射肺。令人咳。○百草鏡。兔耳一枝箭。葉如橄欖形。邊有鍼刺。只七八葉。貼地生。八月抽莖。高近尺許。花如柏穗。而有萌刺。莖葉有毛。七月採。有小鹿銜銀茶匙。忍冬草。月下紅等名。○汪連仕云。兔耳箭初生苗。名金茶匙。入血分。止吐血。治肺癰。王安采藥方。葉底紅者。名金茶匙。

性寒味苦。行血涼血。入肺經。清肺火。治吐血勞傷。調血最效。爲怯弱要藥。肺癰肺痿。黃疸心疼。跌打風氣傷力。效嗽咯血腫毒。

腸癰肺癰縮腳癰。慈航活人書。用白石楠葉嫩腦十二箇。兔耳草二兩。好酒煎服。肺癰二服。腸癰縮腳癰一服。卽愈。

骨蒸勞怯。吳普仁方用兔耳一枝箭蒸鷄服。

獨葉一枝鎗

生深山。四五月間土人採得入市貨之長二三寸一莖二梗一梗一葉葉如兔耳又似箭頭一梗細尖如新抽竹萌故名。○百草鏡獨葉一枝鎗生山原清明時發苗穀雨後死長二三寸一葉一花葉如橄欖花似錐鑽。

味甘淡功用與一枝箭同。○朱煥齋任城日記諸毒蟲咬以獨葉一枝鎗草生擦之即愈。

金邊兔耳

形如兔耳草貼地生葉上面淡綠下面微白有筋脈緣邊黃毛茸茸作金色初生時葉稍捲如兔耳形沙土山上最多。

味甘淡治虛勞吐血。

兔耳酸

汪連仕草藥方即穿地鈴治跌打損傷。

金線釣蝦蟆

蔓生田野山石間葉似二角風光潤帶青黃色根名金線釣蝦蟆又名獨腳蟾蜍亦名金線重樓準繩

痘毒方中用之。非綱目草河車及蚤休也。○丹房本草。金鈴草。一名挂金藤。亦曰金線釣蝦蟆。其子狀如鈴。折斷蒸液如乳汁。取自然汁伏雄制硫。其霜可煉雌煮汞。○百草鏡。金線釣蛤蟆生山土。莖蔓紅細根大。葉類金鎖匙。芒種時開花如穀精花。採根入藥。按防己亦與此相似。但根形不似蛤蟆。莖不甚紫。葉不甚圓。有尖歧。葉中蛛網紋不明不多爲別。○草寶云。金線重樓生陰山腳下。根有疙瘩。形類蟾蜍。入土不深。剉土易取。其性涼。乃吐藥也。小滿時發苗。蔓延紫色。葉不相對。類黃龍藤而柔軟。葉上有蛛網紋甚明。若葉不圓而微尖。紋不明。莖不甚紫。形不類蟾蜍者。乃防己。非重樓也。○汪連仕草藥方。紅線者是金線釣蝦蟆。青莖者乃漢防己。○王聖俞云。重樓根儼如三足蟾。其根旁又生根結蟾蜍。年久者掘得一本之下。根有數十。蟾蜍壘橫掛。其力最大。○趙貢栽云。金線釣蝦蟆生者力大。乾者稍次。凡大毒服之必吐。人多懼畏勿用。然吐後其病如失。毒卽內消。凡發背毒氣攻心。非此不治。若小毒斷不可用。因藥力性大病不能相當也。不能相當則有偏勝之害。

性平味苦。消癰去風散毒。百草鏡。根性涼。托癰疽。追散腫毒。治瘰癧。爲外科聖藥。○採藥志。治腸癰。追風敗毒。○葛祖方。吐痰涎。可代瓜蒂。○扁鵲心書。金線重樓。俗名金線釣蝦蟆。采得去外黑皮。用石槌打碎。勿犯鐵器。曬乾爲末。小磁瓶收貯。凡遇一切要吐痰涎之症。用代瓜蒂最妙。風痰結胸。用一錢陰陽水和服。傷寒成瘡。用一錢臨發空心水和服。禁口痢。用一錢涼水服。忌鐵器。

跌撲傷。張氏傳方取根搗汁酒和服渣敷。

葉名天膏藥。貼腫毒破爛能拔毒收口拍熟貼毒能拔毒水外出酒煎服治心疼磨水搽痔煎膏貼百病。○汪連仕草藥方天膏藥治疔瘡惡毒流注痺毒鼠瘻合生酒搗服敗毒功多食之令人吐瀉。

雞蠱草

此草深秋有開紫花子如椒核處處原隰皆有葉如苧麻葉而氣臭故名雞蠱必效方云海寧沈清芝患風毒穿流五六處疼痛異常覓此草服之一劑即愈。

治風毒流火取一握煎酒吃或入酒煮一炷香去渣服俱效。

老君鬚

百草鏡云此草立夏後發苗葉似何首烏微狹對生莖與葉俱微有白毛不似何首烏莖葉之光澤根類白薇白色極多故名入藥用根。○王安採藥錄老君鬚生溪湖邊起藤二三尺梗青根鬚白黃色有數十條能消痞。○按王三才醫便云老軍需春夏秋冬常有青出衆草爲尊莖藤青葉似檳葉而尖小根如鬚白似芋頭根牽藤而去俗名社公口鬚亦治腫毒採根搗生酒服渣敷患處。

味辛性熱破瘀毛氏癰疽方用之治癰癧。

治痞結。醫便痞結年久成龜鼈者累用極效用老軍需一味春夏用莖葉秋冬用根不拘多少用好。

生酒一罐。外用鯽魚一雙。和藥同入罐內。日落時煮。以魚熟爲度。令患人先食魚。次飲酒。再以藥渣攪痞結所至。次早去之。大小便見物下卽效。如不應。連服三五次。追其物無跡。而神效難言。余曉園云。治風癩。消血癥。面黃痞塊。

汪連仕云。老君鬚根細如白薇。理氣消腫。通利關格。敗毒消癰。俱以酒煎服。

王安采藥方。金釵草根名老君鬚。合龍虎丹用。治三十六種風症。癱瘓鶴膝等風。

葛公草

傳信方云。藥似蛇卵草。又似吉慶子。面青有蒙。背白色。三葉分枝。梗似薔薇有刺。四月間結子。取根用子亦可入藥。

治血症。傳信方云。將葛公根一兩。忌鐵器。用木擊碎。以水二大盃煎作一盃。加好酒一盃。再煎至茶杯八分。臥時服。服後蓋暖周身。以手磨胸膈臍腹數遍。明晚如前再服一兩。後日亦如前服一兩。連服三日愈。

葛祖方。葛公草一名家母藤。治腳氣腫疼。沙木槌搗汁。熬成膏。鵝翎掃患處。乾卽潤之。

芸香草

職方考。出雲南府。能治毒瘡。入夷方者。搗以自隨。如嚼此草無味。卽知中蠱。急服其汁。吐之可解。○按

雲南志出昆明有二種。五葉者名五葉芸香。非葉者名非葉芸香。治瘡瘡。藥性考云。生成五葉。產昆明。治瘡毒等疾。專能解蠱。搗汁服之。非葉芸香能截瘡瘡。夷人多邪蠱。搗此草嚼之無味。卽知中毒。

雲南志解蠱。治毒瘡。一切瘡毒瘰癧。並搗汁服。

藥性考。味辛。治症同。

鏡面草

滇南志出滇中能通血脈。○按此草今處處有之。多生階砌石畔。葉如指面大而圓。其邊微作碎齒。葉面光如鏡。深綠色。土人呼爲蜻兒草。又名地連錢。不見開花。止見葉而已。亦呼鏡面草。不知滇中所產卽此類否。

性涼。治肺火結成膿血癰疽。採藥志。月閉和嫩蕪煎酒服。滇南志。

石將軍

一名紫羅毬。秋時開花。有紫色圓暈。生高山石上。立夏後生苗。葉類龍芽草略小。對節。高不過尺。根本勁細似六月雪。○謝雲溪云。西湖鳳凰山有之。生石岸旁者入藥。地上生者太肥。治症不能卽驗。葉如椶木對生。方梗紫色。高尺餘。開細紫花成毬。能活血疎風。消癥散腫。

五葉草

味淡性平。治一切跌打損傷。血瘀不散。搗汁服之。或以水酒同煎。如風寒閉塞。或癰疽初起。服之俱效。

此卽燒人場上草也。程雲來卽得方。名五葉草。亦不載形狀。能移痘後眼翳。用此草搗如豆大一餅。如左眼有翳。貼右眼角肉上。其翳卽移至右眼。再用此餅貼左眼角肉上。其翳移至鼻梁內。卽去此餅。翳膜便除。

蛇草

諸羅志。形似菠薐。開小白花。按綱目有蛇眼草。生古井及年深陰溼地。形如淡竹葉。葉背有紅圈。如蛇眼狀。搗敷治蛇傷。未知卽一物否。附以俟考。治蛇傷。連根搗罨傷口。仍煎泡酒服。立愈。

汪連仕采藥書。蛇眼草產鄉間蘆叢水澤旁甚多。治一切蛇傷疔痔。俗呼蛇口半枝蓮。又名落得咬。千年健

朱排山柑園小識。千年健出交趾。近產於廣西諸上郡。形如藤。長數尺。氣極香烈。可入藥酒。風氣痛老人最宜食此藥。忌菜菔。

壯筋骨。浸酒同煎地風虎骨牛膝甘。止胃痛。酒磨服。

蜈蚣萍

生溪澗田港止水中。若流水則不生。形如蕨。其中一莖。兩旁細葉攢對。似蜈蚣狀。故名。葉頗糙澀。不似浮萍之光澤。綱目水藻集解下有馬藻。葉亦對生。形亦微似。而實非一物。蓋藻可食。此則不可食。故主治亦別也。俗呼邊箕萍。○羣芳譜。麻藻萍之異種。長可指許。葉相對聯綴。不似萍之點點清輕也。按麻藻。卽今蜈蚣萍。

治蟲。同壽錄。蜈蚣萍曬乾燒煙熏之。則一切跳蚤壁蝨皆除。

老鶴草

龍柏藥性考補遺。出山東。

味苦微辛。去風疎經活血。健筋骨。通絡脈。損傷痺症。麻木皮風。浸酒常飲。大有效。或加桂枝。當歸。紅花。芍藥等味。入藥用莖嘴。

鬼香油

汪連仕草藥方。鬼香油。細葉者。名天香油。連根葉搗汁。其味如香油。故名。○李氏草秘。鬼香油。苗葉如香薷。

一人大腿腫痛。二三月。有膿內潰。不得出。垂危。罨上卽破膿出。數服而愈。以此草汁調敷藥。尤妙。治諸癰腫毒。冬瓜癰。附骨疽。李氏草秘。冬瓜癰。附骨疽。用此草加甘草一錢。入醬板鹽花搗罨有效。調

肌膚滋顏色。敗瘡毒。土人止蛇咬蜂螫。載毛傷。取葉擦之。汪連仕草藥方。
肥兒草

龍柏藥性考補遺。產廣西平樂縣。

治小兒一切疾及痧脹。需爲要藥。

玉釵草

李氏草祕。此草對葉圓梗。生近田水溝中。

治打傷跌腫損折。搗汁服之。罨諸腫毒。

汪連仕采藥書。草裏金釵開黃花。細莖獨苗直上。如醒頭草。治金瘡活血。白濁遺精。開白花者。草裏銀釵。白玉釵草。治婦女白帶白淫。合生白酒煎服。

石蛤蚧

百草鏡。生山土。根皮色紅。入藥用根。○周維新云。石蛤蚧乃映山紅之根。○花鏡云。山躑躅。俗名映山紅。類杜鵑花而稍大。單瓣色淡。若生滿山頭。其年必豐稔。有紅紫二色。紅者取汁可染物。○李氏草祕。石蛤蚧苗長二三尺。莖方。葉似竹葉。根形如蛤蚧。堅如石。○敏按汪連仕方。映山紅根名翻山虎。土人呼搜山虎。治癩痺能拔根。醫風合巴山虎蒸酒服。名二虎丹。核其功用。雖不甚懸殊。而究其形狀。的非

一種當以李氏草祕所載爲是。

煎洗梅瘡能消風塊。

風氣痛。祝穆效方。地蜈蚣草。石蛤蚧草。各等分。紹酒煎服。

腸癰。景岳新方。腸癰生於小肚角。微腫而小腹隱痛不止者是。若毒氣不散。漸大內攻而潰。則成大患。急宜以此藥治之。先用紅藤一兩許。以好酒二盃。午前一服。醉臥之。午後服紫花地丁一兩許。亦如前煎服。服後痛必漸止爲效。然後再服末藥除根。○末藥方。用當歸五錢。蟬退。殭蠶。各二錢。天龍。大黃。各一錢。石蛤蚧五錢。老蜘蛛二個。新瓦上以酒杯蓋住。外用火煨乾存性。同諸藥爲末。空心用酒調服一錢許。逐日漸服自消。經驗廣集。石蛤蚧用葉。

禿瘡。不藥良方云。卽肥瘡日久。延蔓成片。髮焦脫落。又名爛頭瘡。先以艾葉。鴿糞煎湯洗淨瘡。再用豬肉湯洗之。隨用躑躅油。以躑躅花根四兩搗爛。用菜油一盃煎枯去渣。加黃蠟少許。布濾候冷。以青布蘸搽。日三次。氈帽戴之。勿令見風。散毒能令癢止。髮生久搽自效。

疔腫諸毒。○李氏草祕。石蛤蚧用酒磨服。少得入口。垂死可生。有此則不愁疔瘡之患。諸腫毒。醋磨敷之。

香蕉

皇華紀聞。粵地溼熱。人多染麻瘋。所居室人不敢處。必種香蕉。木本結實者於院中。一二年後。其毒盡入樹中。乃敢居。兩廣雜志。蕉種甚多。子皆甘美。以香蕉爲第一。名龍嫺嫺者。乳也。言若龍之乳。不可多得。然食之寒氣沁心。頗有邪甜之目。其葉有硃砂斑點。植必以木夾之。否則結實時風必吹折。故又名折腰娘。凡蕉葉必三三開。則三落落不至地。但懸掛莖間。乾之可以作書。花出於心。每一心輒抽一莖作花。聞雷而坼。坼者如倒垂菌。蒼層層作卷瓣。瓣中無蕊。悉是瓣。漸大則花出。瓣中每一花開。必三四月乃闔。一花闔成十餘子。十花闔成百餘子。小大各爲房。隨花而長。長至五六寸許。先後相次。兩兩相抱。其子不俱生。花不俱落。終年花實相代謝。雖歷歲寒不彫。子經三四月始熟。粵人嬰兒乳少。輒熟蕉子飼之。又以浸酒。味甚美。其蕉心嫩白。可爲菹。綱目芭蕉條下所載各類。於香蕉獨未明晰。今依粵志補之。

收麻瘋毒。

五雜俎。鳳尾蕉。其本纍巨。葉長四五尺。密比如魚刺。然高者亦丈餘。又有番蕉。似鳳尾而小。相傳從琉球來者。云種之能辟火患。是水精也。枯時以鐵屑糞之。或以鐵釘釘其根上。則復活。蓋金能生水也。植盆中不甚長。一年纔落下一葉。計長不能以寸。亦不甚作花。予種之三十年。僅見兩度花。其花亦似芭蕉。而色黃不實。

鐵樹葉

出東洋舶上帶來。葉如篋箕。生兩旁。作細尖瓣。嗅之有清氣。似梅花香。○按羣芳譜。鐵樹出海南。閩廣多有之。其花狀如鐵絲燈籠。廣張千瓣。瓣各一花。程扶搖花鏡。鐵樹葉類石楠。質理細厚。榦葉皆紫黑色。花紫白如瑞香。四瓣較少。團一開。累月不彫。嗅之乃有草氣。海南人言。此樹黎州極多。有一二尺長者。葉密而花紅。樹儼類鐵。其枝極穿結。甚有畫意。入盆玩最佳。但人罕見。故稱奇耳。橫州馴象衛殿指揮貫家。有鐵樹。每遇丁卯年開花。而出五臺山者。定以六月十九日開花。楊萬里詩注。鐵樹葉似蕪而繁。榦如密節菖蒲。似此諸說。同一鐵樹。而開花與枝葉又不同如此。今洋中帶來及世俗所用入藥之鐵樹。葉形如篋箕。據云。其樹須壅以鐵屑。乃盛。則番蕉葉也。以其食鐵。故亦名鐵樹。其性亦平肝。取其相制爲用。亦頗驗。謝肇淅五雜俎。番蕉能辟火患。將枯時。以鐵屑糞之。或以鐵釘釘其根。則復活。蓋金能生水也。種盆中不甚長。一年纔落下一葉。計長不能以寸。亦不甚作花。三十年僅見兩度花耳。花亦似芭蕉。而色黃不實。羣芳譜。鳳尾蕉。一名番蕉。產於鐵山。如少萎。以鐵燒紅穿之。卽活。平常以鐵屑和泥壅之。則茂。而生子分種易活。江西塗州有之花鏡。鳳尾蕉。一名番蕉。產於鐵山。江西福建皆有。葉長二三尺。每葉出細尖瓣。如鳳尾之狀。色深青。冬亦不彫。如少萎黃。以鐵燒紅釘其本上。則依然生活。平常不澆壅。以生鐵屑和泥壅之。自茂。且能生子分種易活。極能辟火患。人多盆種庭中。以爲奇玩。友人

唐振聲在東甌見鳳尾蕉。土人皆呼爲鐵樹。則知今人所用及洋舶帶來之葉。皆番蕉葉。而非真正鐵樹葉也。瀕湖於隰草部。祇列甘蔗蘘荷。而於虎頭鳳尾等蕉。概不及焉。或當時未有知其性者。今錄之以補其缺。

平肝。統治一切肝氣痛。

難產。鐵樹葉三片。煎水一盃服之。卽下。指南。

鐵樹

家寶真傳云。亦名鐵連草。生於鐵山銅壁之上。又鐵石之上亦生。並非草本。形如屏風。狀如孔雀尾。分張。黑色細枝。刀砍不斷。斧之乃折。治一切心胃及氣痛。煎湯服。立愈。

藥性考。鐵樹黑色。葉類石楠。逢丁卯年。開花四瓣。紫白色。形如瑞香。圓小不醜。樹高數尺。止血下痰。其花人採以治痰火。

留青日札。鐵樹花海南出。樹高一二尺。葉密而紅。枝皆鐵色。生於海底。諺云。鐵樹開花。喻難得也。

虎頭蕉

出福建臺灣五虎山者佳。一莖獨上。葉抱莖生。不相對。形類蕉而小。苗高五六寸。秋時起莖。開花似蘭。

色紅結實有刺類蒺藜子外面苞狀若高三四尺者名美人蕉係一類二種也今閩沙縣亦出草寶虎頭蕉性溫力猛有毒能治風痹凡服者不得過二錢服後須避風倘不謹慎必發風疹

治風痹性熱去風

治血淋白帶一切吐血舟車經驗方用芭蕉一大片入鍋內炒乾存性爲末黃酒調服立效此方亦

治一切吐血若用美人蕉更妙

藪草

宦遊筆記南人呼爲藪麻北人呼爲蠟子草黔境遍地有之葉類麻多毛刺觸之螫人腫痛不可忍此毒甚於蜂蠶蠍蝮墨莊漫錄川陝間有一種惡草羅生於野其枝葉拂入肌肉卽成瘡泡浸淫潰爛久不能愈卽藪麻也白香山詩颶風千里黑藪草四時青此草有花無實雪下猶青故也人海記塞山有毒草中人肌膚毒甚蜂蠶自唐山營踰汗鐵木嶺外遍地有之俗名蠟子草蘆高四五尺葉如麻嫩時可供馬秣經霜則辛螫不可觸綱目尋麻條止載其塗蛇毒點風癩他皆未及悉補之

治瘋采取煮汁洗亦可肥豕

解暈草卽廣東萬年青

今人呼爲廣東萬年青葉如建蘭而深厚入冬不彫初苗芽背作紫色長則色青夏開紫花成穗亦如

麥冬狀其根有子分苗種極易繁茂以其出自粵中故名綱目有名未用吉祥草下瀕湖所引吉祥草即此也亦呼吉祥草時俗婦臨蓐以此草連盆移至產室云能解產厄及血暈此草色澤翠潤葉葉勁直如箭入產室則葉皆軟垂色亦槁瘁必經數月乃復鮮豔亦一奇也其根下子入藥用海寧周世任云此草根下子大冷子宮凡婦欲斷產取子百粒搗汁服永不再孕矣

性涼味甘理血清肺解火毒爲咽喉七十二症要藥

萬年青

一名千年蓋闊葉叢生每枝獨瓣無歧梗葉頗青厚夏則生蕊如玉黍狀開小花叢綴蕊上入冬則結子紅色性善山土人家多植之浙婚禮多用之伴禮函取其四季常青有長春之義○百草鏡四月八日浴佛日杭俗人家植萬年青者多翦其葉棄擲街衢云令人踏之則易長且發新葉茂密入藥采葉陰乾煎洗坐板痔瘡極效勝於他日采者土宿本草雁來紅萬年青皆可制汞

甘苦寒治咽喉急閉搗汁入米醋少許灌之吐痰而愈藥鏡云其根多作草子可催生從新乳香湯香帶出藥性考云味苦微甘解毒清胃降火能止吐血同紅棗七枚劈開煎飲用嫩葉陰乾根療喉痹以

養心葉短尾圓者真

白火丹。祝氏效方。萬年青搗汁服。

痔漏。○家寶方。萬年青葉取汁。如無汁。卽用根水少許。同搗取汁搽。

老幼脫肛。慈航活人書。萬年青連根煎湯洗。用五倍子末敷上。立效。

一切跌打損傷。活人書。山芝麻。橡栗樹花。萬年青花。鐵腳威靈仙汁。爲丸。黃豆大。每服一九。陳酒下。

頭風。嵩崖雜記。霹靂丹。治頭風如神。用萬年青根削尖。蘸硃砂塞鼻孔內。左塞右。右塞左。兩邊痛者。

齊塞。神效。取清水鼻涕下。須一週時妙。

蛇毒。德勝堂傳方。用萬年青磨塗渣卷。皆妙。

陰囊大。用萬年青根搗汁。熱沖陳酒服三次。卽愈。

痔瘡腫痛難行。活人書。豬腿骨去兩頭。同萬年青入砂鍋內。水煮一炷香。乘熱薰溫洗。日三次。數日。

愈。永不發。

纏喉風。經驗單方。用萬年青根頭切碎打爛。絞汁灌下。吐出痰涎。卽好。倘口閉。用牙刷挖開灌下。不。

吐。再用髮梢進喉間探之。

汪連仕云。萬年青。俗呼冬不彫草。治瘡毒。收溼熱。洗腳氣。湯泡火傷。天泡瘡。白蛇纏。搗汁搽。

王安采藥方。治中滿蠱脹。黃疸心疼。哮喘咳嗽。跌打傷。

李氏草祕萬年青。今酒肆多種之。能解眼蠱。治白火丹。爲末。酒服一二錢。卽愈。又治噎膈。

仙半夏各種麴附。

近日諸醫皆用之。藥肆亦多製備。相傳製法係仙人所傳。故名仙半夏。能化痰如神。若不信。將半夏七八粒。研入痰盃內。卽化爲清水。其法用大半夏一觔。石灰一觔。滾水七八盃。入盆內攪涼。澄清去渣。將半夏入盆內手攪之。日曬夜露七日足。撈出控乾。用井華水洗淨三四次。泡三日。每日換水三次。撈起控乾。用白礬八兩。皮硝一觔。滾水七八盃。將礬硝共入盆內攪涼。將半夏入內浸七日。日曬夜露。取出清水洗三四次。泡三日。每日換水三次。取出控乾。入後藥甘草。南薄荷各四兩。丁香五錢。白芷。三錢。沈香一錢。枳實。木香。川芎。肉桂。各三錢。陳皮。枳殼。五味子。青皮。砂仁。各五錢。右共十四味。切片。滾水十五盃。涼溫。將半夏同藥入盆內。泡二七日足。日曬夜露。攪之。將藥取出。與半夏同白布包住。放在熱坑。用器皿扣住。三炷香時。藥與半夏分胎。半夏乾收用。有痰火者服之。一日大便出似魚膠。一宿盡除痰根。永生也。綱目半夏條附方。載法製半夏。其製法與此不同。今藥肆所售仙半夏。惟將半夏浸泡。盡去其汁味。然後以甘草浸曬。入口淡而微甘。全失本性。名曰仙半夏。並非照方製法。醫家亦視虛人有痰者用之。以爲性平。和而不傷。於燥烈。是無異食半夏渣滓。何益之有。清痰開鬱。行氣理痺。痰疾。中風不語。研七八粒。同井華水送下。以手摩運腹上。一炷香時。卽醒能語。

敏按巽雲林云。仙方製半夏。化痰成水。皆治壯人痰火有餘之症。服之有效。虛人痰火忌服。

各種半夏麴。綱目半夏修治條。引韓飛霞醫通造半夏麴。云能專治各病。又不載其製法。特爲補之。

生薑麴。薑汁浸造。治淺近諸痰。

礬麴。礬水煮透。兼薑和造。最能卻水。治清水痰也。

阜角麴。煮阜角汁煉膏。和半夏末爲麴。或加南星。稍加麝香。治風痰。開經絡。

竹瀝麴。用白芥子等分。或三分之一。竹瀝和成。略加麴和。治皮裏膜外結核隱顯之痰。

麻油麴。麻油浸半夏。浸五日。炒乾爲末。麴和造成。油以潤燥。治虛欬內熱之痰。

牛膽麴。臘月黃牛膽汁。略加熟蜜和造。治癩癩風痰。

開鬱麴。香附。蒼朮。撫芎等分。熬膏。和半夏末造成。治鬱痰。

硝黃麴。用芒硝十分之三。同麴煮透。爲末。煎大黃膏和成。治中風卒厥傷寒。宜下。由於痰者。

海粉麴。海粉雄黃居半夏之半。煉蜜和造。治積痰沈痼。

霞天麴。用黃牛肉煎汁煉膏。名霞天膏。將膏和半夏末爲麴。治沈疴痼痰。以上諸麴。並照造麴法。草

廩七日。待生黃衣。懸掛風處。愈久愈佳。

建神麴范志麴。白酒藥麴附。

出福建泉州府開元寺造者佳。此麴採百草罨成。故又名百草麴。以黑青色煎之成塊不散。作清香氣者真。色帶黃淡者曰貢麴。力和平。不及青黑者力大。此麴愈陳愈妙。藥性考。泉州神麴。微苦香甘。搜風解表。調胃行痰。止嗽瘧痢吐瀉。能安溫疫嵐瘴。散疹消斑。感冒頭痛。食滯心煩。薑煎溫服。或二三錢。造云百草法祕不傳。得名范志。塊造方端。用之應效。饋遠人歡。○蔡氏藥帖云。治風寒暑溼頭眩發熱。表汗立愈。能消積。開胸理膈。調胃健脾。及四時未定之氣。兼能止瀉消腫。及飲食不進等症。又能止霍亂吐瀉。咳嗽。赤白痢疾。小兒傷饑失飽一切症。倘外出四方。不服水土。瘴氣肚痛。皆取效如神。○范志齋蔡協德住泉州府城西街東塔前。向造百草神麴。卽今建麴。每個重半觔。或四兩。乾隆辛卯五月。蔡氏正造麴。忽有一客至。視百草而歎曰。當今男婦老幼。秉氣衰薄。百草恐傷元氣。予有奇方。共藥九十六味。配合君臣佐使。另加十二味。青草紫蘇薄荷等物。搗爛煎湯。合共一百零八味。製爲小方塊。每塊一兩。按端午及六月六日。諸神會聚。皆可依法製造。藥性平和。氣味甘香。遠行者宜備。可以代茶常服。大人每服三錢。水一盃。煎七分。小兒每服一錢五分。水一茶鍾。煎六分半。饑飽時服。忌生菜。惟孕婦不可服。此藥切片煎湯。藥渣不散。須認形色淡黃者爲真。○福建泉州府城內范志吳亦飛馳名。萬應神麴。氣味中和。清香甘淡。能搜風解表。開胸快膈。調胃健脾。消積進食。和中解酒。止瀉利水。治四時不正之氣。感冒發熱。頭眩咳嗽。及傷食腹痛。痞滿氣痛。嘔吐泄瀉痢疾。飲食不進等症。痘疹初發。用托邪毒。

又治不服水土。瘴氣瘡痢。外出遠行。尤宜常服。大人每服三錢。水一湯盃。煎七分。小兒每服一錢半。或一錢。水一大茶鍾。煎七分。每錢破作五六塊。外感發熱。頭眩咳嗽。瘡疾嘔吐。俱加生薑同煎。泄瀉加烏梅同煎。惟痢疾一症。須加倍用。大人每用五錢。小兒二三錢。加好箔茶心同煎。每劬價銀一兩六錢。若用匣裝。每個五文。店住學院考棚邊桂檀巷內。觀音亭頂南畔第三間。范志吳氏牌匾爲記。

白酒藥麴。藥性考曰。白酒藥麴。松江得名。良薑四兩。草烏半觔。吳萸白芷。黃柏桂心。乾薑香附。辣蓼苦參。秦椒九味。一兩等分。菊花薄荷。二兩齊稱。丁皮益智。五錢杏仁。共爲細末。滑石五觔。米粉斗八。河沙拌勻。造丸乾用。釀酒芳馨。炒焦拌食。滯積消靈。

帕拉聘

七榕園西域聞見錄。帕拉聘。草根也。全似三七。但色藍或黑。出溫都斯坦。回地人多往採取。重價貨於回城。云可治疾。中土人弗達。不敢嘗也。

治一切陰冷痼疾。服之立除。

一枝蒿

紹郡府佐李秉文。久客西陲。言巴里坤出一種藥。名一枝蒿。生深山中。無枝葉。一枝苗土。氣味如蒿。四月間。牧馬卒驅馬入山。收草攜歸。煎膏以售遠客。有販至蘭州貨賣者。

活血解毒。去一切積滯。沈痼陰寒等疾。驅風理怯。

香草

石振鐸本草補。西國產香草。山野徧生。樹高尺許。枝幹蚪曲。經冬不彫。花小而色紫白。成實時中有小黑粒。春時插之。卽活。惡肥而喜潔。遇夏卽生小蟲。因蠅卵所致。見小白點與絲網。宜去之。衣袖觸動。芬芳襲人。可紉以爲佩。采其花藏衣箱中。能辟諸蟲。焚其枝葉。能辟除瘟疫嵐瘴。房屋溼穢氣自除。

主治解鬱。凡心懷憂悶。以布包置左脇下之傍。能令胸膈舒暢。○除蚤蝨壁蝨。取枝葉暴乾爲粉。以布包貼肌膚上。須多乃效。○體受風寒不快。以枝葉煎湯浴之。浴後睡片時。卽愈。○食不知味。以葉煎酒。空腹飲之。同麪食。使舌本津津。饜飮。○面有黑癩。取葉或水或酒濃煎。每晨塗面。能滅斑滋顏。○齒痛。動搖。醋煎葉。乘熱擦之。漱之。○又治胃火盛口臭。頭多風癬。并髮穢觸人。與記舍腦也。不堅固。取葉煎水。服時加醋。不特除頭外之病。并裨頭之內司。蓋人之記舍在腦故也。

敏按以上所說。皆出泰西石氏本草。核其形狀功用。則似今人所名爛孩兒草。近是。但爛孩草正名爛草。見霜卽萎。並非經冬不彫。入春子種。其宿根亦不發。亦罕有尺許虬曲之枝幹。或泰西地暖土肥。如粵中之茄。可以經冬成樹。或又別有一種木本者。姑存其說以俟考。

臭草

本草補。泰西既產香草。復產臭草。雖薰不同。猶效用則一。其本高尺餘。開小黃花。摘花蕊陰乾待用。與葉同功。結子成實。裂分四房。每房子數粒。春秋二仲皆可種之。春月將枝插之亦活。不畏霜雪。亦不喜肥。須澆以清水。人以手搯之。便臭氣拂拂。亦非穢污朽腐可比也。其功用亦與香草等。植樹下能殺樹上蟲。植圃中能辟蛇蠍蜈蚣等諸毒。

泄瀉及小便不通。取臭草葉或生或煮食之。服毒并蛇蠍蜈蚣等毒。急取臭草葉生食。其毒自解。腹內蛔蟲。以清油煎臭草葉。搗爛敷臍上。勝食使君子遠矣。鼻血。取臭草葉搗爛。塞鼻孔即止。危急重病昏暈。采葉醋烹。搓熟塞鼻。即醒。耳痛。以臭草葉搗爛。取自然汁。置石榴皮內煨過。滴耳中。目痛。以葉置清水內。露二三日。將葉蘸水點眼。目力過勞。以臭草葉自然汁。加蜂蜜一滴。并略加小茴香。自然汁調和點眼。久則光明。楊梅瘡。以自然汁略加好酒并清水粉。同煎治之。婦人心氣痛病。由於子宮上沖。用臭草葉嗅之。以愈爲度。大庾曹上士曾用此方。歎其靈驗。小兒大便腸出。以好酒煮臭草葉搗爛。用布作膏貼之。